




金匱要略

光緒辛丑七月  
江蘇書局重刊



金初無文字也自太祖得遼人韓昉而言始文太宗入宋汴州取  
經籍圖書宋宇文虛中張斛蔡松年高士談輩後先歸之而文字  
熠興然猶借才異代也至蔡珪傳其父松年家學遂開金代文章  
正宗洎大定明昌之閒趙秉文楊雲翼主文盟時則有若梁襄陳  
規許古之勁直党懷英王庭筠之文采王若虛王渥之博洽雷淵  
李純甫之豪俊爲金文之極盛及其亡也則有元好問以宏衍博  
大之才足以上繼唐宋而下開元明與李俊民麻革之徒爲之後  
勁迹其文章雄渾挺拔或軼南宋諸家乃好問編中州集詩同時  
有馮清甫亦輯金文至百餘卷惜竟不傳其專集之幸存者惟拙  
軒滏水滹南遺老莊靖遺山五者而已今廣蒐嚴遴汰其麤率取  
其雅馴釐爲十六卷附以作者考略名曰金文雅聊存一代之文  
獻云爾

道光二十一年夏六月秀水莊仲方序

采取書目

拙軒集

滏水集

淳南遺老集

遺山集

莊靖集

大金集禮

中州集

大金國志

松漠紀聞

歸潛志

金史

元文類

玉堂嘉話

高麗史

薊州集

安陽金石錄

河南通志

沂州志

泰安府志

平陽府志

棲霞縣志

山左金石志

祖庭廣記

式古堂書畫彙考

欽定全金詩



金文雅體例

- 一金集傳者五家餘皆采自他書今除五集外各注采書子目下  
其有本集不收從他書選入者亦注明
- 一金文雖無南宋冗長萎弱之習閒傷麤率茲選其雅馴者至青  
詞及爲釋道二家作概不錄入已十汰其七八矣
- 一作者名氏爵里及其行事各述大略以備知人論世之鑒
- 一字文虛中吳激張斛高士談皆宋臣而仕于金則錄之劉祁揚  
宏道揚奐王鶚皆金臣而仕于元則刪之如李俊民元好問杜  
仁傑雖入金而獨能完節故應錄入以遂其志
- 一欽定全金詩搜輯無遺今約選五七言古詩各一卷近體從  
文粹之例不采

金文雅體例

金文雅作者考

秀水莊仲方述

完顏勛字勉道本名烏野穆宗第五子官至左丞相太保領行臺三省事封漢國王勉道剛好學以金初未有文奉敕撰祖宗實錄又預平宗磐之難材兼文武大定中詔以詩文鏤板今已不傳

完顏宗幹本名幹本太祖庶長子佐太祖太宗平遼官至太師封梁宋國王有金議禮制度正官名定服色興學選士治歷明時皆宗幹于天會初啟之

完顏宗憲本名阿懶幼入太學官至右丞相太子太師宗憲十六入學即為太宗所器從其兄宗翰克宋汴京眾人爭取財物獨載圖書以歸世宗朝多所建白信任特專人稱宗室賢相

紇石烈良弼本名婁室回怕川人天會中以女直字學生入選年十四為北京教授官至右丞相卒封金源郡王諡誠敏良弼聰

金文雅作者考

一

明正直知人善斷起寒素為冢宰二十年佐世宗成太平之功時稱良相大定十五年圖像衍慶宮諡武定明昌五年配享世廟

完顏宗磐本名蒲盧虎太宗子天輔五年佐完顏杲取中京熙宗時官至尚書令拜太師封宋國王以逆誅

宇文虛中字叔通成都人宋黃門侍郎使金留仕為翰林學士承旨皇統初上京諸虜俘謀奉叔通奪兵仗南奔事覺繫獄諸貴夙憾叔通侮慢之乃鍛鍊所藏圖書為反具并連高士談受誅人皆冤之

吳激字彥高自號東山宋宰臣拭子使金被留為翰林待制出知深州遽卒彥高工詩其字畫得婦翁米元章筆意亦以知名留金遺山稱其詞為大朝第一有東山集今佚

張斛字德容漁陽人宋武陵守入金官秘書省著作郎德容能詩兼工字畫有南游北歸等集今佚

蔡松年字伯堅父靖宋燕山守郭藥師敗靖以燕山降元帥辟松年爲令史後除眞定府判官遂爲眞定人官至右丞相加儀同三司封衛國公諡文簡伯堅事繼母以孝聞自號蕭閒老人文詞清麗與吳激齊名時號吳蔡體

高士談字子文一字季默宋韓武昭王瓊之後宣和中任忻州戶曹入金官翰林直學士金諸貴欲以藏圖書死宇文虛中遂與禍有蒙城集今佚

施宜生字明望邵武人宋政和中爲潁州教授後以罪北走事僞齊不得志金擢爲太常博士官至翰林院侍講學士自號三住老人使宋歸以洩軍情烹死明望在潁州時從趙德麟游頗得蘇門沾丐

曹望之字景蕭其先臨漢人遼季移家宣德天會閒以秀民子選充女直字學生除西京教授世宗朝官至戶部尙書景蕭有才而躁進既貴益刻苦讀書有詩集已佚

金文雅作者考

二

徒單克寧本名習顯其先金源縣人後占籍萊州熙宗時以母舅左丞相希尹薦爲符寶祇候官至尙書令太師封淄王卒諡忠烈配享章廟史稱克寧功高而身愈下位盛而心愈勞可謂大臣

石琚字子美定州人父臯爲郡吏有陰德琚自幼讀書過目成誦天眷二年進士第一官至右丞相封莘國公卒諡文獻配享世廟子美遭遇世宗君明臣良一時無二學亦賅洽

祁宰字彥輔江淮人宋季以醫術補官金師破汴得之隸太醫累遷中奉大夫太醫使煬王欲伐宋上疏切諫戮于市籍其家天下哀之世宗詔贈資政大夫復其田宅章宗擢其子爲尙藥局都監諡宰曰忠毅

申良佐

蔡珪字正甫松年子天德三年進士官至禮部郎中出守濰州道卒正甫七歲賦菊詩語意驚人擢第後不求選調日求未見書

讀之辨博冠當時金初如宇文虛中吳激蔡松年施宜生輩文墨雖工然猶借才異代惟正甫爲金代文章正宗其著述甚夥今皆不傳

王寂字元老薊州玉田人天德三年進士官至中都路轉運司使卒諡文簡元老詩文清拔爲滹南莊靖二家先導有拙軒集

劉汲字伯深渾源人天德三年進士官至翰林供奉自號西巖老人有西巖集今佚

張公藥字元石宰相孝純子滕陽人以文蔭入仕官郟城令仕至昌武軍節度副使詩號竹堂集今佚

馮子翼字士美大定人正隆二年進士官至同知臨海軍節度使事

完顏宗浩字師孟昭祖四世孫漢國公昂之子貞元中爲煬王入殿小底官至尙書右丞相卒諡通敏師孟與僕散揆皆才兼將相世宗倚之以成大業者

金文雅作者考

三

梁襄字公贊絳州人大定三年進士官至保大軍節度使公贊爲薛王府掾時上疏諫止世宗游金蓮川直聲著朝廷學問亦賅洽

周昂字德卿眞定人第進士爲南和簿歷官監察御史以事斥謫南海復起爲三司判官大安軍興以權行六部員外郎從宗室承裕軍城陷與子嗣明同死節德卿以孝友聞文筆高雅其謫也坐以詩送路鐸事被斥其起也以邊功有常山集今佚

徒單鑑本名按出猛安人大定九年策女直進士及第者二十七人鑑與上選授中都路教授官至左丞相封廣平郡王鑑明敏方正學問賅博名士多出其門胡沙虎之亂賴鑑一言而宣宗立宗社以安著宏道集今佚

党懷英字世傑宋太尉進十一代孫父純睦爲泰安軍錄事參軍卒于官遂爲奉符人大定十年進士官至翰林學士承旨卒諡文獻趙閒閒稱世傑文似歐柳詩似陶謝至篆籀入神則李陽

冰以後一人而已

劉迎字無黨東萊人初以廕試部掾大定十四年進士除幽王府記室改太子司經自稱無諍居士有詩文樂府號山林長語詔國學刊行今佚

王庭筠字子端熊岳人大定十六年進士官至翰林修撰子端七歲能詩風流醞藉冠冕一時文亦高出時輩所薦引如趙秉文馮璧李純甫皆名士世以知人許之平生愛天平黃華山水自號黃華山主

趙胤字文孺自號黃山東平人大定中進士官至禮部郎中文孺學道有得尤工書懷英小篆爲李陽冰後一人世以文孺配之號曰党趙

高汝礪字巖夫應州金城人大定十九年進士官至尙書右丞相封壽國公卒後配享宣廟巖夫以慎密廉潔結主知而乏剛毅故遺山以爲守成良相恨所遭不時耳

金文雅作者考

四

劉昂字之昂興州人大定十九年進士官至左司郎中降上京留守判官

王澗字逸賓自臨洛遷汴梁明昌中以馬吉甫薦官鹿邑主簿旋歸逸賓孝友天至博學能文與王彥功游宗之齊名人皆以高士目之調一作欄

師拓字無忌平涼人舉進士不中明昌中有司薦其才以嗜酒不果詩有氣象鍊句尤工

蕭貢字真卿咸陽人大定二十二年進士由涇川觀察判官仕至御史中丞以戶部尙書致仕卒諡文簡真卿博學能文人比之蔡正甫官右司郎中時修泰和律令爲帝嘉歎以蕭何期之著有史記注五聲韻譜文集今皆佚

趙秉文字周臣磁州滏陽人閒閒其自號也大定二十五年進士官至禮部尙書金代文章正宗正甫開其端周臣昌其緒裕之殿其終著述甚夥傳于今者有滏水文集

張行信字信甫先名行忠避莊獻太子諱改莒州日照縣人御史大夫睦子大定二十八年進士爲銅山令累官至尙書左丞信甫純正眞率奏事不知避忌兩登相位殆若無官愚賢皆以正人目之氣節亦在高汝礪上

胥鼎字和之代州繁峙人尙書右丞持國之子大定二十八年進士官至平章政事封英國公和之爲宣哀時名相爲政靜鎮南渡後以書生鎮方面者一人而已

侯摯字莘卿東阿人明昌二年進士官至平章政事封蕭國公致仕居汴崔立以汴城降爲北兵所殺莘卿威重敢言喜薦士雷淵麻九疇輩皆其進用南渡宰執中人望最重

酈權字元輿安陽人武寧軍節度使瓊子以門資敘宦不達朝廷高其才明昌中召授著作郎旋卒有岐軒集今佚

龐鑄字才卿大興人明昌五年進士官至京兆運使才卿風流文采爲時輩所推兼工字畫自號默翁

金文雅作者考

五

田琢字器之蔚州定安人明昌五年進士調寧邊在平主簿官至山東東路轉運使權知益都府事行六部尙書宣差便宜招撫使

楊雲翼字之美樂平人明昌五年進士第一興定末拜吏部尙書官至翰林學士卒諡文獻之美初學語卽作字日誦數千言于學無所不能與趙閒閒代掌文柄人稱楊趙且剛直敢言人所不敢言爲宣宗敬畏金百餘年來士大夫身備四科惟之美一人著述見于史者今皆不傳

陳規字正叔絳州稷山人明昌五年進士官至右司諫出爲中京副留守未赴卒正叔性剛學博爲諫官時天子敬之近習畏之南渡諫官稱陳許而正叔不以許直自名劉從益見其所上八事嘆爲宰相才惜當時不能用云

許古字道眞河間人汾陽軍節度使安仁子明昌五年進士官至右司諫道眞在宣宗朝以敢諫與陳規齊名致仕歸伊陽郡守

爲起伊川亭每乘舟游飲老稚爭爲挽舟其爲時人愛慕如此  
韓玉字溫甫漁陽人明昌五年進士官至河平軍節度副使囚死  
華州溫甫官翰林應奉時應制一日百篇文不加點又作元勳  
傳爲章宗所稱大安三年都城受圍溫甫約華州李公直入援  
當路忌其功言公直反置極刑以溫甫預謀囚華州郡學死士  
論冤之

王若虛字從之自號慵夫藁城人承安二年進士官至翰林直學  
士從之經史賅博爲一代冠且長于經濟百不一試易代後北  
歸鎮陽以老有滹南遺老集

馮延登字子駿吉州人承安二年進士天興中官禮部侍郎城陷  
投井死子駿于正大末北使見留降之不從羈管二年放歸卒  
以節見受詩法于趙開閒有橫溪翁集今佚

馮璧字叔獻別字天粹承安二年進士歷州縣召入翰林官至同  
知集慶軍節度使叔獻在太學有聲其學長于春秋宣宗朝屢

金文雅作者考

六

以使指鞫大獄權貴有跋扈而朝廷不能摧伏者能以法制之  
詩筆清峻如其人趙周臣李之純王從之皆重之

李純甫字之純宏州襄陰人承安二年進士官至尙書右司都事  
終京兆府判官之純天才辨博以小官上萬言書後度其道不  
行益放于酒浸淫釋氏學遂駁而不純遺山謂中州豪傑惟之  
純與雷希顏有鳴道集

李俊民字用章晉城人承安五年進士第一官應奉翰林文字未  
幾棄官教授隱于嵩山自號鶴鳴老人元世祖召見仍乞還山  
卒賜諡莊靖先生用章以遺老遯荒蹟類遺山詩文亦如驂之  
靳有莊靖集

李秉鈞官尙書省掾泰和初定功名諡法李上書請諡祁宰制曰  
可太常諡宰忠毅

王特起字正之代州崞縣人泰和三年進士調真定錄事參軍官  
至司竹監使正之無所不能長于辭賦與屏山爲忘年交官真

定有惠政民立碑頌之

趙元字宜之定襄人經童出身舉進士不中以年及調鞏西簿未幾失明宜之以詩鳴泰和閒病廢壹志于詩五言平淡處尤妙李屏山亟稱之自號愚軒居士

完顏疇字子瑜興陵之孫越王之子封密國公子瑜好學如寒土工詩文家藏法書名畫與中秘等喜交天下賢士自趙閒閒以下皆推重之爲宗室第一流人所居有樛軒又有如庵自號樛軒老人詩集名如庵小稿今佚

劉從益字雲卿渾源人大安元年進士官至監察御史被黜起爲葉縣令入授應奉翰林文字旋卒雲卿博學強記其罷御史以忤當路尹葉縣有惠政邑人留之不得聞其死立石頌德長子詩五言古尤工子祁郁皆有名有蓬門先生集今佚

雷淵字希顏一字季默應州渾源人崇慶二年進士官至監察御史終翰林修撰希顏治縣有劇才官御史論天下事不報慕田

金史雜作者考

七

疇陳元龍之爲人人亦以古人期之遺山論中州豪傑獨推希顏之純云

完顏素蘭一名翼字伯揚至甯元年進士官至金安軍節度使兼同華安撫使宣宗召赴行在道中遇害伯揚在諫垣首攻高琪有古諍臣風

元德明秀容人唐禮部侍郎結之後累舉不第以詩酒自娛自號東巖

郝天挺字晉卿澤州陵川人太學生崇慶之變知時事不可爲遂歸隱從遊極盛裕之其最也貞祐初人爭南渡而扼于河河陽三城至淮泗數千里流民數百萬多飢疫死者晉卿貽書范元直使聞諸朝乃得疾速放渡河朔之民全活甚眾孫經以忠節文章冠元代

完顏宗魯貞祐二年官樞密承旨提舉軍器

李獻能字欽叔河中以省元賜第廷試第一宏詞優等授應奉

翰林文字歷官至鎮南軍節度副使充河中經歷河中陷道梗不得歸就權陝府行省左右司郎中軍變殉節欽叔以純孝爲士論所重卒以節死詩其餘事亦高人一等

高永字信卿漁陽人自號應菴

王中立字湯臣岢嵐人博學強識元遣山嘗從之遊晚年易名雲鶴自號擬翔人皆以仙稱之

劉炳葛城人貞祐三年中進士第卽上書言十事宣宗善之而不能補御史臺令史

王渥字仲澤以字行興定二年進士調管州司候不就高庭玉節度武勝軍辟爲經歷官至權右司郎中天興元年出援武昌爲元兵所殺仲澤博通經史其辨博爲李之純所稱天下談士三人之一也詩其專門

秦略字蘭夫陵川人少舉進士不中以詩自業自號西溪老人有集今佚

金支雅作者考

八

劉昂霄字景玄別字季房陵川人以父俞廕調慶陽軍器庫使不就當道方薦試宏詞已卒景玄過目不忘于學無所不闕其卒也年才三十七

雷瑄字伯威坊州人以薦從事史館調八作司使亂後南奔爲兵士所殺伯威博學能文與并州李汾善

元好問字裕之太原秀容人德明子興定五年進士官至行尚書省左司員外郎金亡不仕裕之七歲能詩見知于趙閒閒易代之後謂國亡史作以金源著述自任構亭曰野史亭記錄至百餘萬言今所傳止中州集其詩文足以冠金元兩代有遺山文集

李汾字長源平晉人元光末舉進士不中以薦得從事史館後署行尚書省講儀官爲參知政事恩烈所害

麻九疇字知幾莫州人興定末府試第一正大三年以侯摯趙秉文薦試館職賜二甲第一人及第授太祝官至應奉翰林文字

知幾三歲識字七歲能草書及大字數尺者有神童稱後博通

五經天性野逸不與世合其詩精深峭刻似其爲人  
王元粹字子正初名元亮後改平州人正大末爲南陽酒官遭亂  
爲黃冠師與從弟鬱同以詩名

徒單公履

麻革字信之臨晉人兵部侍郎秉彝子元末隱居教授以終河汾  
諸老八人之一也元房祺爲編其詩

段成己字誠之號菊軒稷山人正大閒進士官宜陽主簿金亡元  
起爲府提舉教授不赴與兄克己同以文章擅名見稱于趙閒  
閒又皆以節著

王鬱字飛伯平州人天興初死于兵詩學温李工樂府

張獻字君玉大名朝城人嗜作詩至老不衰

杜仁傑字仲梁一字善夫濟南長清人與遺山善元時累徵不起  
李獻甫字欽用河中人第進士爲咸陽簿官至鎮南軍節度使死

金文雅作者考

九

蔡州難欽用與從兄欽叔兄欽止欽若故將種而同時四進士  
人門之秀照映一時居官有幹略博通羣書尤精左氏及地理  
之學詩文號天倪集今佚

陳時可字秀玉自號寂通居士劉祁之友

金文雅總目

卷一

賦七篇

卷二

五言古詩八十八篇

卷三

七言古詩五十九篇

卷四

詔令十六篇

冊文七篇

卷五

奏疏十八篇

卷六

奏疏八篇

金文雅總目

表五篇

卷七

書五篇

箴一篇

銘六篇

頌二篇

贊六篇

卷八

廟碑八篇

闕一篇

上梁文一篇


十八篇

卷九

記十六篇

卷十

記七篇



卷十一 序引九篇

議三篇

論五篇

原一篇

說二篇

題跋十一篇

卷十二

祭文三篇

哀辭二篇

傳一篇

墓銘九篇

卷十三

墓銘八篇

卷十四

墓表六篇

卷十五

墓碑七篇

卷十六

墓碑四篇

金文雅  
總目

金文雅卷一目錄

賦

興學賦 潞州志

巖蔓聚奇賦

海青賦

栖霞賦

遊西園賦

秋望賦

行齋賦

申良佐

王寂

趙秉文

趙秉文

趙秉文

元好問

元好問

金文雅卷一目錄



賦

興學賦并引

申良佐

河東爲天下雄勝之地而上黨乃河東名郡故號爲天下  
 脊其人物勁豪自古忠臣義士多出焉郡之長衢之東南  
 文明之地有學校存焉自隋而上遠而不可知見之碑刻  
 者李唐以來於此已有之矣厥後世變多故其學校亦隨  
 而興衰迨乎國朝撫定之後專以文學取士而郡之士子  
 紆青拖紫者比比有之學之興也從可知矣至正隆開學  
 者多困于征役不暇修習其學舍漸至摧毀幾不能蔽風  
 雨良可惜哉欽惟主上中興以來敦復文教俾郡國俱修  
 學校獨斯郡之學累經前政寢而不議自通守權鎮喬侯  
 下車之始首議興修自大定丁酉五月丁巳經始至是年

金文雅卷一

十月乙亥告成越明日丙子集僚屬郡儒於議道堂大合  
 樂以落之方此工之將畢也適有旨立學官養天下之士  
 固其興衰自有時乎何如此之偶然也僕固嘉喬侯興學  
 之勤意又且樂遇明時之爲幸故敢作興學之賦以獻焉  
 其詞曰

吾聞三代之道兮立庠序建首善自於京師至于鄉里有教焉將  
 令俗易而風移使四方皆從其化兮足以立太平之基故然明請  
 毀鄉校子產對所以議政之善否奈何而毀之如其廢而不修鄭  
 人刺以子衿之詩雖文化由上之人倡率亦由守令奉承以周施  
 故文翁起學於成都之市經明行修者皆足以任使自後郡置其  
 學官由蜀郡而爲之始范甯亦立學於餘杭使諸生敦行而潔已  
 致風行而化流自晉之中興以來未有如此嗟吾邦學舍之荒涼  
 土木盡爲之摧毀豈止學者之不可居芻蕘牧豎者皆得而至上  
 諸生有待其興修蓋亦累年於茲矣嗟我喬侯之來何莫兮今方

幸得一新而崇起將以尊師講道義明經取青紫由是鄉里之閒  
郁郁乎有文絃誦之聲洋洋乎盈耳文翁固無少讓范甯烏足爲  
比蓋誠加勤意而然豈虛尙清談而已佇看不次而升之廟堂之  
上誠能教育天下英才之美蓋君子之所樂固無以加於是諸生  
或有謂僕曰方此工之將畢也適有旨養天下之士何其不謀而  
同歸異處而同出僕應之曰斯固興廢之有數亦乃君臣之德一  
僕方悼道之鬱滯而文明之化不圖復見於今日固將與諸生樂  
昇平之永履嘅學廢於疇昔倘非斯道之復興則吾徒將安之而  
講習噫喬侯之心仁人之心也狂斐之言形容之不足故復系之  
以短什且與諸生歌之詠之所以推揚其茂實也

巖蔓聚奇賦

王寂

伊合抱之巖藤迹其生之有漸挺標末其不凡商世用而尤瞻裁  
搗馬之短筆縮維舟之長纜斷滇池飛電之杖組湘浦含風之簞  
獨高節之擁腫外纍纍然中歎顧匠石之數過不側目而一覘有

金文雅卷一

二

好事者非常風鑿破長橋之蛟卵剖巴山之猿嗛其混然而天成  
微斧鑿之可驗彼寶石雖潔而近乎俗金玉雖珍而幾于僭當樽  
俎之勝處惟瘦君之獨占惜流落于市井爲時人之所厭幸淇泉  
之賞音輟酒直而見念不然則灰爨下之桐而失艷城之劍老人  
旣歸而謀諸婦曰我以酒隱處身純儉欣此物以有託了吾生而  
無憾於是撥春甕之嘈嘈漉乳泓之湛湛挹彼注茲十分激灑追  
顏子之瓢飲陋管氏之反坫咀嚙石蟹之霜螯狼籍荷盤之菱芡  
少焉旣夕風清天淡舞月影兮徘徊吸露華兮汎濫已而先生徑  
醉也宮錦淋漓角中欵墊捲河漢於一酌盡江湖於一蘸洗戰國  
之蠻觸弔古今之時暫陶陶乎釋身世之羈縛浩浩乎謝功名之  
機陷然後神遊八表兮其將以躡冥鴻之背而探驪龍之頷也

海青賦

秦和愿從春水作

趙秉文

霜空蕭條塞草先白海樹無枝海雲寡色黯兮遼迴風悲日匿何  
鷺鳥之不羣起翰波而一息爾其俊氣橫鶩英姿傑立頂摩穹蒼

翼迅東極鐵旬利背霜排勁翮角膝插腦細筋入骨顧盼雄毅飛騰滅沒旦寄巢於扶桑夕刷羽於褐石於是乃命虞人遡風繳緇  
□設萬里足繫一枝心折遂投軀以委命恥摧翼以喪節奚奴頭  
千髯官指百時饑飽以嗾呼謹寒溫之調適臂不暇弛鈴不停掣  
猶恐懷林邱夢砂積恨身繫而子留歎雄孤而雌隻也逮其骨肉  
融性情習違龍沙入閩闔蒙禁鬱之專寵叨錦鞞之前席思報功  
於所養甘賈勇於一決旣而新□屆候太簇司月陽燄浮冰漸折  
水溶溶而汎綠鵝翩翩而下唼探使星馳屬車雷發千輿隱磷萬  
騎飄瞥上將幸乎春光之中所以觀民風而宣鬱結龍旆標而殿  
門敞虎旅圍而鼓聲疊忽水擊而驚飛乍雲翔而成列玉爪翻管  
錦絛下繼初貼水而徐回倏于雲而上擊雨血紛紜風毛磔裂象  
廣寒之舞紛霓裳之回雪侶吳宮之戰驚玉顏之喋血壯如破敵  
勢甚擒賊至如關羽義勇張綱奮烈取鯨鯢于堅陣叱豺狼之當  
轍固亦釋豐狐之九尾略狡兔之三穴蓋猶賞驥足之神駿且以  
勸忠於英傑也旣而壽杯舉臣工悅天威暢皇恩洽背長楊兮而  
趨京闕

栖霞賦 送道人還山

趙秉文

粵有人兮襲芳華跡城郭兮志烟霞賦言歸兮杳何許蹇遲迴兮  
徒延佇貝闕兮珠宮撫膝上兮絲桐高情兮天外歸鴻靈宮兮玉  
紀玄都兮寶藏祝君王兮萬壽侍玉宸兮天上辱莫辱兮多憂樂  
莫樂兮無求望白雲兮歸休三年胡爲兮此淹留朝游兮山南暮  
游兮山北徙倚兮亭上聊逍遙以終日日舞兮清暉臨深兮翠微  
西山扶兮曉釀秋水樂兮朝饑山近兮多雨雲昏兮承宇烟銷  
兮霧散見恆茂兮遠樹樹斷兮天開鴈翩兮南渡忽人歸兮鳥盡  
但空山兮日暮日暮兮浮雲滋目極千里兮傷心悲山中兮歸  
來白首不歸兮何時亂曰山中兮烟霞宅翠羽簾兮白玉額有  
友麋鹿兮侶猿鶴飲清泉兮坐白石山中兮烟霞衣青天成幄  
兮白露成帷風爲襟兮玉爲佩娛清暉兮澹忘歸山中兮煙霞

語黑霓落手兮醉毫舞蓬萊山兮在何處乘清風兮欲歸去  
趙秉文

九月令辰皆醉趙子獨游西園蓋故苑同樂之地于時天高氣清  
風物淒厲草綠慘以斷蔓果紅薦而脫節若乃藻扇黼閣簷摧檻

圯曲池荒而飛螢灌木老而雉雉嗟物是而人非何昔榮而今悴  
既而登高臺俯清泚天落鏡中水涵空際物無倒影之心水無涵

空之意心與境忘境融神會先生一笑而作渺歸鴻於天外  
元好問

秋望賦  
步裴回而徙倚放吾目乎高明極天宇之空曠閱歲律之崢嶸於

時積雨收霖景氣肅清秋風蕭條萬籟俱鳴菊鮮鮮而散花鴈杳  
杳而遺聲下木葉於庭臯動砧杵於蕪城宵林早寒陰崖畫冥濃

淡霏拂繞白紆青紛叢薄之相依浩霜露之已盈送蒼蒼之落日  
山川鬱其不平瞻彼轅轅西走漢京龍蟠虎踞王伯所憑雲烟慘

其動色草木起而為兵望崧少之霞景渺浮邱之獨征汗漫之不  
可與期竟老我而何成挹清風於箕穎高巢由之遺名悟出處之

有道非一理之能并繫南山之石田維景略之所耕老螭盤盤空  
谷淪精非雲雷之一舉將草木之偕零太行截天大河東傾邈神

州於西北悅風景於新亭念世故之方殷心寂寞而潛驚激商聲  
於寥廓慨涕泗之緣纓吁咄哉事變於已窮氣生平所激豫州之

土復於慷慨擊楫之誓西域之侯起於窮悴傭書之筆諒生世之  
有為寧白首而坐食且夫飛鳥而戀故鄉嫠婦而憂公室豈有夷

墳墓而剪桑梓視若越肥而秦瘠天人不可以偏廢日月不可以  
坐失然則時之所感也非無候蟲之悲至於整六翮而睨層霄亦

庶幾乎鷺禽之一擊  
行齋賦

元好問

戊子冬十月長壽新居成仲經張君從子卜鄰得王氏之  
敗屋焉環堵蕭然不蔽風日君為之補罅漏治蕪穢蓋十  
日而後可居華門圭竇故事畢舉取君子素其位而行之

義名曰行齋而乞文於予予以為士之貧至於君極矣無  
祿以為養無田以為食無僮僕為之負販無子弟為之奔  
走無好事者為之謀緩急而助薄少率貲無旬日計泰然  
以閉戶讀書為業不以為失次而以為當然不以為怨不  
以為憂而又且以為樂也然則不謂之無媿其名也而可  
乎迺為賦云

賦分在人如物有常反鶴與鳧無益短長力有可乘勝天不祥福  
不盈睫一敗莫償莫難養心操存舍亡出入無時兮莫知其鄉飽  
飢有時而激兮怒殆豢虎之貽殃我思古人動靜有方靜以養虛  
剛以作強辱以處汗愚以退藏屹中立而不倚遡橫潰而獨障直  
釣磻溪之魚禿節單于之羊有漆身以為厲自被髮而為狂任汗  
世而執翽徇殊俗而解裳太阿存兼善之達縕袍有不求之臧唯  
夫長劍大冠以揖讓人主之前者若固有故木食澗飲雖至於勞  
筋骨而餓體膚者為無傷古有之居不隱者志不廣身不抑者志

金文雅卷一

五

不揚士固有遯世而不復見然愈揜而愈彰南山蒼蒼北風雨霜  
有蘭不彫俟春而芳偉哉造物又將發吾子之幽光耶

太阿即阿衡見文選

金文雅卷二目錄

五言古詩

病後寄開甫

平安關道中二首

丁巳九月夢與范季雷同登北潭之臨芳亭覺而作詩記其事以示范

七月還邗

梨花

臥病有感二十韻

感寓

南園步月

許下三庚劇暑盛于他州懷思故鄉嶧山山水

也感而作此

岐山南顯道冷香亭

金文雅卷二目錄

感秋

穆陵道中二首

西湖芙蓉

寄題禹城孫氏茂德亭

南口

晚到八達嶺下達旦乃上

張禮部棲山真樂圖棲卷中作溪

內鄉浙江張浮休窪尊為二兄賦

冬夜二首

中秋

初望少室

木犀

自鶴壁游善應洹山

感秋

吳激

張斛

蔡松年

蔡松年

高士談

朱之才

蔡珪

劉汲

張公藥

馮子翼

周昂

党懷英

党懷英

劉迎

劉迎

劉迎

王庭筠

王庭筠

師拓

趙秉文

趙秉文

鄺權

鄺權

王若虛

失子

同希顏怪松

村居夏日

讀樂天無可奈何歌

泛舟回瀾亭坐中作

和淵明始春懷田舍

九日登少室絕頂同裕之分韻得蘿字

濟南珍珠泉

同侯子晉賦鴈

贈蒼彥文相過之作

枕上

邺城秋夜懷李仁卿

跋賈天叔所藏段志寧山水

中秋

金支雅卷二目錄

二

王若虛

馮璧

趙元

趙從益

劉從益

雷淵

雷淵

元德明

元德明

元德明

李獻能

高永

王中立

三門津

拳秀峰

游五渡谷

古意四首

緱山置酒

穎亭留別

元魯縣琴臺

龍門雜詩二首

乙酉六月十一日雨

觀浙江漲二首

五松平平當是

贈蒼楊煥然

曉發百門渡湍水道中

學東坡移居八首

王渥

秦略

劉昂霄

雷瑄

元好問

梨花海棠二首

元好問

宿張靖田家

元好問

同白兄賦瓶中玉簪

元好問

別李周卿三首

元好問

九日讀書山中三首

元好問

元裕之以山游見招兼以詩四首爲寄因以山中之意仍其

韻

麻九疇

西山避亂三首

王元粹

置酒半山亭得秋字

麻革

題梁氏靜樂堂

段成己

陳子正安容室

段成己

傷別曲

王鬱

送侯道士

張璪

金文雅卷二目錄

五言古詩

病後寄開甫

吳激

暗蛩咽幽響隙月漏微光溪上風雨過翛然有餘涼病瘦鶴骨立  
低垂不能翔懷我中山兄開經焚道香猿嘯耿清夜鐘鳴悠夕陽  
商秋早晚至夢寐松楸蒼

平安關道中二首

張斛

高林俯青冥柯葉森若織陽光已轉午陰嶺仍半黑崢嶸亂石閒  
行子有苦色深臨地勢入涉險天宇塞四顧無所投迹重去未息  
悵然增百憂冥冥羨歸翼

窮冬十日陰積雪千山路晴雲開半嶺落日猶在樹悠悠客心速  
慘慘天色莫寒鳥各有依解鞍向無處游魚誤銜鈎元豹終隱霧  
行行謝冠冕復我林壑趣

金文雅卷二

一

丁巳九月夢與范季雷同登北潭之臨芳亭覺而作詩記其  
事以示范

蔡松年

高陵五六松潭水涵清陰白鳥如避世巢居得幽深雜花眩青紅  
苦節方森森何人作虛亭想像雲棲心我夢涉陳迹君亦同登臨  
相與定嘉名洗去花草淫看雲撫修碧夕景低遙岑風林淡秋月  
霜枝鳴玉琴兩意誰識之好處煩幽尋閒居志則同歲月能駸駸  
時無陶彭澤此曲難知音亭前有奇石遷流失山林顧亦如我曹  
鬢髮風沙侵小兒重外物列屋享千金區區心甚長因循困華簪  
忽焉事大謬危機恐難任平生下澤車斯言吾所欽志士願不辱  
俗情便孔士自喜迹猶淺鳧鴈容浮沈泥行自蕭散世路皆崎嶇  
此邦真可老城郭環清潄結廬與君俱開寫平生襟里巷日還往  
杖屨行謳吟還尋夢游處無忘神所箴

七月還祁

蔡松年

洪河注天南兵氣橫高穹我從兵前來歸心疾驚鴻官柳未搖落

蓮荷香濛濛吏舍在前村舊年養疎慵爰自三軍去青苔瘞人蹤  
夕陽叩柴門歡迎來僕僮濁酒古壘洗停觴問新松卻對一床書  
睡鴨孤烟中土花暈湖玉水絃冷霜桐燈火未可親露坐茅堂東  
西山月中淡夜茶煮松風到床便安寢不復知晨鐘平生幽棲心  
斯言略形容人道動有患百態交相攻而我觸類眞冶容鄙青紅  
非才見臨事叩之輒空空知難不知回飄流劇飛蓬暫去聲利場  
樂伏猶無窮況於得行意蕭洒畢此躬勿爲才者傳從渠作夔龍

梨花

高士談

中原節物正梨花配寒食黃昏一雨過滿地嗟狼籍塞垣春已深  
花事猶寂寂朝來三月半初見一枝白爛熳雪有香龍鬚玉仍刻  
芳心點深紫嫩葉裁輕碧懶慢不出門雙瓶貯春色殷勤遮老眼  
邂逅慰愁夕一尊對花飲況有風流客酒闌思故鄉相顧空歎息

臥病有感二十韻

朱之才

皐蘇粲園英澤芝紛水葉赤弁舞襪肌黃袍緩老頰鳴飛各有適

全宋雅卷二

二

吾獨嗟衰鬢齒髮久已疎又復失調變梁肉謝鼎俎參苓富巾篋  
葵扇風未來桃笙汗初浹呻吟和哀蟬夢寐追化蝶撫枕念平生  
世故飽更涉弱齡負奇志胸蜺盤燁晷夜僊傳崑訪朝待渭濱獵  
苟爽歲九遷康侯日三接功業著鐘鼎聲名垂史牒那知事大謬  
舉趾得躑躅多難集莫年百願亡一愜寒灰消寸心清淚腐雙睫  
坐令孤鵬騫化作瘴鴛跼憂來復自慰人生幾莫莢呼吸過百歲  
俯仰失千劫乘流須縱權遇坎卽停楫些語不成騷商歌鼓長鈇

感寓

蔡珪

九官名世人制作歸一夔達樂不達禮漢儒言足嗤古人寓意耳  
結髦持鍛錐俗子未易識絕藝聊相推坐令編簡門亦以專門奇  
堂堂張長史楷妙世莫知謂予言不信願視郎官碑

南園步月

劉汲

雲橫樹外山樹映山巔月微風拂寒枝疏光散清樾幽歡難相遇  
此景安可忽從來山水心不爲塵埃沒

許下三庚劇暑盛於他州懷思故鄉嶧山水真清涼境界也感而作詩

張公藥

魯東百里近福地曰晷繹千峰開玲瓏絕澗瀉湍激岱宗古獨尊

象繹了不隔嶧山至秦不遠此山許攀聯朝著有班秩虛巖互霞蔚秀

石森玉立泉聲動環珮林樂盡竽瑟林樂出莊子樹老潤饒菌果熟香

隕實漱風松落花泓雪崖溜蜜木輒虎磨癢沙迴鳥伸羽禽鳴

仲翻劉禹錫集竹葉若來往桃源當甲乙曾經晉人隱晉郗鑒因避亂

傳本喜脫塵網密事往不記年人說猶前日我來官許下濁暑病逾

劇慢膚便枕簟白汗沾巾憤屢輟五夜眠輒廢中盤食炎官令方

虐著意不憐容語此作惆悵可以知得失遙知舊經行雲起水邊

石平生二三子相對坐橫策今世葛天民何容挽之出

馮子翼

溪橋小雪晴水村霜月冷暗香林薄聞得偶璀璨影殷勒南夫子

移植在人境芝蘭馥氤氳珠璧照光炯小屋茅草葢幻此蕭洒景

金雅卷一

三

看花藝松明醒醉漱苔井文章聊嬉戲辭氣頗馳騁州縣不着腳

時人笑清鯁我官西州掾簿領不知省頻遭官長罵勢屈石在頂

門庭可張羅陋巷車轍靜山歌聽嘲哂舞伎或痛癢引睡閱文史

朝日無從承夢到五柳莊身居六盤嶺揭來南山下旅思淒以耿

金罍照衰朽玩味得俄頃傍人怪迂疎佳處當自領

感秋

周昂

秋氣入行帳愁人中夜知雞聲與人語耿耿異常時清晨起危坐

感歎不自持羲和馭飛轂往返無停期春草如昨日已復悲離離

顧謂鏡中髮爾衰安得遲結束媚鞍馬荒山去委蛇黃花泣宵露

綠野含晨曦吾事久不諧悠悠隨所之有懷南澗約故賦北山詩

穆陵道中二首

党懷英

沂山一何高羣峰鬱屏顏我行問遺老云此小太山望秩有常祀

其神號東安草荒穆妃墳雨剝漢武壇神仙果何在可想不可攀

千年等一昔俯仰悲人寰東望蓬萊宮咫尺滄波間

重山復峻嶺溪路宛盤盤流水滑無聲暗瀉溪石閒岸草湊以碧  
鮮葩耀紅丹高雲映朝日流景青林端我行屬朱夏欲渴不得閒  
山中有佳人風生松桂寒

西湖芙蓉

党懷英

林飈振危柯野露委荒蔓孤芳爲誰妍一笑聊自獻明妝炫朝麗  
醉態羞晚困脈脈懷春情悄悄驚秋怨豈無桃李媒不嫁惜嬋媛  
悠哉清霜莫其抱蘭菊恨

寄題禹城孫氏茂德亭

劉迎

濟南孫夫子養素抱絕識家有五畝園種樹如種德枝葉深覆護  
根本飽封殖要令方寸地不著荆與棘流芳被鄰里餘蔭連阡陌  
居然物隨化草木盡佳色河陽藝桃李壽張蒔梓漆至今青史上  
相望如黑白乃知百年用賴此一日積君今尙隱約白首勤墾闢  
人心亦天理否泰有終極會待東風來吹春滿花園

南口

劉迎

金戈雅卷二

四

危峰張屏幃峻辟開戶牖朐騰來陣馬翔舞下靈鷲秀色紛後前  
晴嵐迷左右重陰忽障翳虛籟競呼吼深迂愛風日高亢捫星斗  
帝居望北闕村落當南口軍都漢時縣遺跡奄存否中郎讀書處  
遺構想摧朽誰云用武地經訓乃淵藪我家膠東湄樸學歎白首  
居鄰通德里況此見師友慙無書帶草采采爲盈手何以醉先生  
清溪綠如酒疑當作壁

晚到八達嶺下達旦乃上

劉迎

車馬兩山閒上下數百里縈紆來不斷奕奕似流水鯨形曲腰臂  
蛇勢長首尾我車從其閒搖兀如病齒推前挽復後進寸退還咫  
息心固安分尙氣或被指徐趨自循轍躁進應覆軌行行非我令  
柅亦豈吾使倦僕困號呼疲牛苦鞭箠統如五更鼓相慶得戾止  
歸來幸無恙喘汗正如洗何以慰此勞村醉正浮蟻

張禮部溪山真樂圖

王庭筠

悠悠春天雲想見平時閒朝遊溪橋畔莫宿山堂閒澹然不知愁

亦復忘所懼出山初無心既出還思山人閒待霖雨欲歸良獨難  
山堂悵何許蕭蕭松桂寒

內鄉浙江張浮休宦尊爲二兄賦

王庭筠

崑花覆我酒酒而照幽妍風如惜花影不肯生微連空山悄無人  
花枝自留連懷人成獨醉日暮山蒼然

冬夜二首

師拓

雲破月穿牖夜嚴風號隙客子寢不安寒燈照空壁默然不平事  
起坐長太息書但記姓名劍本匹夫敵追奔募前哲恢張濟時策  
何意造物兒重此稻梁役與酣氣益振孤憤遠飄激非無南山雲  
高臥養虛寂茹芝酌懸流嘯吟展胸臆聖達豈不念且有暖席  
此抱誰與知乾坤夜寥闕

破屋星斗入疎牖霜風生沈沈夜何久杳杳天不明燈暗飢鼠出  
月朗棲鳥驚幽意苦盤礴厯落窮八紘貧賤豈足戚所思天下英  
盤木無先容竟與枯朽并旃毳脛纒掩藜藿腹不盈鬱鬱命世才

金支雅卷一

五

何階伸一鳴僵臥蓬蒿底要路誰爲名恥作埽門謁寧爲醴酒行  
直將叫閭闔皎皎開寸誠白日下留照廓廓賢路亨此志恐未必  
搖蕩熱中情

中秋

趙秉文

天風吹河漢明月懸清光清光不可掇流影入杯觴吸此風露魄  
洗我冰炭腸向來功名心一笑雪沃湯人生幾中秋彈指三萬場  
胡爲置熱酒不使心清涼此心如秋月虛明洞八方此身萬化中  
太山一毫芒尙無物與我何者爲彭殤推琴黃葉落矯首白雲翔  
解衣一盤礴清境墮渺茫

初望少室

趙秉文

好山如佳士洗盡名利塵對之斂衽敬可愛不可親一水刻我骨  
一石融我神何況三十六峰峰與天鄰仰看青嶽嶽俯矚白磷磷  
因之攜畫本試寫蒼然眞三日宿其下舐筆不敢皴歸來閉閣臥  
枕上山橫陳題詩追所見何必如古人

木犀

鄺權

菊小未堪摘荒池悴芙蓉窮秋不慰眼幽獨將焉如殷勤蕊宮子  
種桂庭之除乘閒弄餘花散落荒山隅從茲雲月裔漂泊生江湖  
娟娟耐凍枝便與羣芳殊琉璃翦芳葆蛾黃拂仙裾唾袖花點碧  
漱金粟生膚好風一披拂九里香縈紆蘭蕙不敢友荃蓀正儻奴  
妄意此尤物化工異吹噓不然九天香安得獨付渠託物寄深緼  
古今一三閭收攬名草木自比君子徒惟茲不挂口無乃聖不居  
抑夫古簡編斷缺秦火餘君看齊魯臣史筆逸其書惜哉不可曉  
臨風爲嗟吁尤憐元祐前不及附歐蘇末路益可惜例進宣和初  
仙根豈易致百死不一蘇昔遊汴離宮識此傾城姝摩娑三品石  
尙想狎客娛卻後十五年微霜半粘鬚一枝再經眼相對憐羈孤  
不知苦何事玉骨乃爾癯故人憐我老尺書遠招呼要趁秋香濃  
共此碧玉壺遙知嬋娟客與我笑一俱

自鶴壁游善應洹山

鄺權

金支雅卷二

六

清晨發鶴山瘦馬陵峻嶺春風吹雪容朝霧濕雲影羊腸抱傾崖  
絕壑如下井硤關山卻立老眼入絕境人家跨清溪桑柘鬱數頃  
西行復幾里富谷栖短景窮溪水源清溜溜如細綆下流入滿山  
勢合入方騁灘光落鏡明嵐氣排雨冷何年鑿青壁兩佛入禪定  
殘僧久零落遺塔寄烟冥荒涼布金地雜逕樵牧徑同遊成六逸  
轟飲助高興留連更坐臥談笑發嘲咏感物復歎嗟醉語忽徑庭  
青山不愛寶歲歲出礬礦公場沸千夫利井供百鼎誰開爭奪源  
敗此邱壑勝頗思呼有力擲入萬里迴天神定笑我癡絕謾生癭  
長懷古畸人飛夢遶箕穎

感秋

王若虛

西風撼庭柯疎葉鳴策策天地一蕭條羈懷亦岑寂青春悅如昨  
轉盼年半百自從長大來轉覺日月迫功名非所慕老大不足恤  
怛然感時心自亦不能釋清晨理短髮已見數莖白刀鐻雖可施  
殆似兒子劇此身委蛻耳毀棄無足惜況於毛髮閒而乃強修飾

青青如陸展星星行復出畢竟白滿頭復將何所摘

夫子

王若虛

妍妍掌中兒捨我一何遽其來誰使之而復奄然去平生三舉子  
隨滅如朝露顧我能無悲其如有天數自從學道來眾苦頗易度  
有後固所期誠無亦何懼人生得清安政以累輕故婚娶眼前勞  
託遺身後慮百年曾幾何爲此雛稚悞顧語長號妻此理亦應諭

同希顏怪松

馮壁

崧高地氣靈花木竟妍秀玉峰西南趾有松獨怪陋偃蹇如螭蟠  
奮迅如攫獸葉勁須髯張皮古鱗甲皴菌蠢藤瘦怒支離筇節瘦  
月上虬影搖風度雨聲驟子落慰枯禪枝樛礙飛鼪盤根萬乘器  
平葢千歲壽樵斤幸免尋屐匠矧肯構龍化會有時天早期汝救

村居夏日

趙元

官府不著名散迹村落深白雲自朝莫青山無古今愛此夏日永  
門巷多繁陰呼兒具繩床不履亦不簪殷勤好風來爲我消煩襟

金支雅卷二

七

一飽萬事了何用腰黃金羈勒困名馬網羅多珍禽何如山鹿癡  
呦呦戀長林

讀樂天無可奈何歌

趙元

鳧脛苦太短竝足何其多物理斬不齊利劍空自磨老跼富且壽  
元惡天不訶伯夷豈不仁餓死西山阿天意寓冥漠人心徒揣摩  
不如且飲酒流年付蹉跎酒酣登高原浩歌無奈何

汎舟回瀾亭坐中作

劉從益

昔年醉回瀾猶恨身屬官今年邂逅來身與亭俱閒洗心亭下水  
照眼亭西山溪山如故人喜我復來還有酒澆我胸有花怡我顏  
鞦韆乍脫臂但覺天地寬山陰忽回船夜闌情未闌

和淵明始春懷田舍

劉從益

家食自不惡菽水甘清貧學道未有得讀書亦良勤雖勤竟何補  
俛首愧古人靜言閱世故來者日月新况復抱沈疴百憂無一忻  
安得衛生訣益我華池津况如一夢覺不與萬法鄰野人借問我

恐是劉遺民

九日登少室絕頂同裕之分韻得蘿字

雷淵

閒居愛重九佳人重相過登高酬節物少室鬱嵯峩迤邐謝塵土  
夷猶出煙蘿欵如據鼉頭萬壑俯蜂窩浩浩跨積風瀾瀾渺長河  
日車昃紅輪天宇凝蒼波指點數齊州始覺氛埃多我無倚天劍  
有淚空滂沱驚鱗盼與渚倦翼占危柯悔不與家來結茅老巖阿  
歸途睠老阮廣武意如何

濟南珍珠泉

雷淵

大地萬寶藏玄冥不敢私抉開清玉罅渾渾流珠璣輕明疑夜光  
潔白眞摩尼風吹忽脫串日射俄生輝有時如少靳霽沸卻纍纍  
風色媚一川老蚌初未知君看一日開巧厯所不賁遊人隨意滿  
不昇乾沒兒吾謂厯下城繁華富瑰奇貪夫死專利帝意憐其癡  
故露連城珍可玩不可幾若曰天壤間所過皆汝資何必秘篋笥  
自貽伊瑕疵詩成一大笑臆說量天機

金支雅卷一

八

同侯子晉賦鴈

元德明

沈沈江浦雲浩浩朔漠雪微生幾寒暑翅老飛欲折樓中見新過  
夕照送明滅欵枕數聲來疎牕耿殘月悲鳴或天性南北隨所恹  
誰念孤旅人年年爲愁絕

贈答彥文相過之什作竹目

元德明

剝啄誰叩門開門得吾友握手一大笑慰我離羣久之子富才具  
事業可力取瞻望青松姿衰遲愧蒲柳金閨滿鴛鴦什伯自爲偶  
寂莫林野人過從但鄰叟盤飧無兼味符蘇才適口窮達俱偶然  
相逢且杯酒

枕上

元德明

往時見白髮談笑輕歲月誰謂明鏡裏蕭蕭不勝鐸山林蹉跎久  
世虛初未絕觸物重興懷忽忽不自愜遭逢有奇耦才用隨巧拙  
如何杜陵叟自比稷與契茫茫拊塵編何時卒吾業

邨城秋夜懷李仁卿

李獻能

日入羣動息，暝色陰濛濛。故人隔潁水，嫋嫋生秋風。輕風捲纖雲，碧漢磨青銅。坐久襟袖涼，皎月升天東。伊人如此月，霽色羅心胸。可望不可親，倏已駕飛鴻。念此太虛閒，心交神自通。而況千里月，相望寧不同。孤光透薄帷，儼如接音容。翻翻繞枝鵲，唧唧侵塔蛩。上床轉不寐，高樓待晨鐘。相思夜何永，月落秋床空。

跋賈天升所藏段志寧山水

高永

蒼壁雲氣湧，長松風雨寒。湍流擘山出，玉虹飲溪灣。胸中無雲夢，筆底無江山。想見破墨初，布袖蛟龍蟠。壯觀駭魂魄，萬象本自閒。寒齋靜相對，遠意空追攀。

中秋

王中立

素丸東溟來，飛上玻璃盆。聊揮五輪手，撥去萬里陰。印透山河影，照開天地心。人世有昏曉，我未嘗古今。

三門津

王渥

層崖摩蒼穹，四月號陰風。大河三門險，神禹萬世功。他山亦崔嵬，

金文雅卷一

九

砥柱獨尊雄，雷霆日鬪擊。悍暴愁天公，劉侯智有餘。始令舟楫通，仍餘石上穴。飛棧曾連空，遙瞻白玉枝。挺植丹竈中，仙公去不返。此事真冥蒙，夫人與鼓崖。怪幻尤難窮，獨喜兵火餘。巋然出新宮，當時疏鑿意。四海要會同，誰知千歲後。築壘防嘯兇，詩成一大笑。浩浩洪波東。

拳秀峰

秦略

平滑石之俗，其俗資磨礪。磊砢石之秀，其秀在醜中。正如古丈夫，貌寢氣質雄。又如聖人心，孔竅虛明通。大都一拳許，含蓄華與嵩。大巧本若拙，足見造化功。好處元更多，摹寫不易工。君其善調護，抵擊防兒童。

游五渡谷

劉昂霄

南山如碧環，缺處蒼崖開。當年造物手，辦此何神哉。睥睨倚天壁，千古封莓苔。源源萬斛泉，飛出重山來。白龍三百丈，行處鳴春雷。巨石若棟宇，磊砢相推排。跳波與濺沫，餘怒猶喧豨。我來值杪秋，

萬壑風聲哀黃花雜紅樹錦繡紛巖隈奇勝夙所貪欲去仍裴徊  
題詩還自笑媿我非仙材

古意四首

雷瑄

美人傷獨宿窈窕春閨深素手卷翠被當牕調玉琴危絃奏苦調  
清歌抗哀音絃絕歌復咽起作薄命吟妾如朱槿花含英愁晏陰  
郎如青銅鏡照面不照心不怨不照心但惜飛光沈且留連理枕  
莫捲合歡衾儻君回餘輝歡盟尙可尋

對酒不能飲拊劍自度曲一唱行路難歌與淚相續朝爲楊朱泣  
莫爲阮籍哭古道盡荆棘新蹊苦蕢菘曲行違吾心直行傷我足  
曲直無適從昂頭羨鴻鵠

絲絲兔絲草濯濯檉樹枝結根偶相值引蔓纏絲之春風一披拂  
柯葉含榮滋弱質附美蔭百齡誓不違清商忽用事霜飈已淒  
豈意百尺條同此寸草萎委蔓失所託憔悴徒傷悲知君無歲寒  
何用相因依

金荻雅卷二

十

賢王悲墜履賢婦念遺簪重在不忘故微物何所欽嗟我昔遊友  
雲路揚徽音詎念宿昔好棄擲各飛沈昔如膠投漆今如辰與參  
桃李雖成蹊諒無松柏心

緜山置酒

同內翰馬丈叔獻雷兄  
希類賦詩分韻得實字

元好問

靈宮肅清曉細栢含古春人言王子喬鶴馭此上賓白雲山蒼蒼  
平田木欣欣登高覽元化浩蕩融心神西望洛陽城大路通平津  
行人細如蟻擾擾爭紅塵蓬萊風濤深鬢毛日夜新殷勤一杯酒  
媿爾雲間人

潁亭留別

同李洽仁卿張肅子敬王  
元亮子正分韻得畫字

元好問

故人重分攜臨流駐歸駕乾坤展清眺萬景若相借北風三日雪  
太素秉元化九山鬱崢嶸不受陵跨寒波淡淡起白鳥悠悠下  
懷歸人自急物態本閑暇壺觴負吟嘯塵土足悲咤迴首亭中人  
平林澹如畫

元魯縣琴臺

元好問

荒城草木合破屋風雨侵千年一琴臺睠焉涕盈襟遺愛食縣社  
公寧不堪任此臺卽甘棠忍使無餘陰旁舍高以華大豪日捐金  
蒼雲玄武暮鬼物憑陰岑尙德抑玄虛墜典誰當尋我與薦寒泉  
百拜公來臨公來不能知落日下饑禽懷哉空山裏鶴飛猿與吟  
當年于薦歌補袞一何深承平示得意獨能正哇淫君相此一時  
又復悟良箴諛臣坐廢黜盍亦起幽沈蒲輪竟頽轂香草空深林  
寂寞授書室孤甥舉遺衾生平諒已然薄俗別來今千山爲公臺  
萬籟爲公琴夔曠不竝世月露爲知音人間蹄涔耳已矣非公心  
元道州文編以元魯山爲元魯  
縣又臺今爲玄武祠故及之

龍門雜詩二首

元好問

石樓繞清伊塵土天所限人言無僧久草滿不復剡灘聲激悲壯  
山意出高蹇當年香山老掛冠遂忘返高情留詩軸清話入禪版  
誰言海山去蕭散仍在眼溪寒不可涉倚杖西林晚  
不見木庵師胸中滿泥塵西牕一握手大笑傾冠巾青山有佳招

金文雅卷一

七

一游負因循老筇動高輿萬景森前陳乾元先有期清伊亦知津  
細看潛溪樹高臥香山雲學詩二十年鈍筆死不神乞靈白少傅  
佳句儻能新遙遙洛陽城梅花千樹春山中有忙事寄謝城中人

乙酉六月十一日雨

元好問

一旱近兩月河洛東連淮驕陽佐大火南風捲黃埃草樹青欲乾  
四望令人哀時時怪事發雨雹如李梅我夢天河翻崩騰走雲雷  
今日復何日駛雨東南來元氣淋漓中焦卷意已回良苗與新穎  
鬱鬱無邊涯書生如老農苦樂與之偕閭閻吉語一笑心顏開  
酉年酒如漿乾盜安能災唯當作高廩多具尊與壘家人笑問我  
君田安在哉音見魏志同

觀浙江漲

浙水在鄞陽  
見水經注

元好問

一旱千里赤一雨垣屋敗浙故以江名暴與眾壑會初驚沙石捲  
稍覺川谷隘雷風入先驅大塊供一噫千帆鼓前浪萬馬接後派  
崩崖不暇顧拔木無留礙憑陵如藉勢洄洑各有態平分乍舒徐

怒觸忽碎壞雲蒸楚樹杪雪映商嶺背髣髴千丈潮悅與海門對  
飲飛鬪蛟鱷燃犀出鱗介陽侯富陰族萬首露光怪翠蕤澹偃蹇  
鉦鼓亂陶磕永懷疏鑿力重歎神禹大乾坤海爲壑未礙變橫潰  
納汗非無處流惡聊自快投詩與龍盟滌蕩煩一再時拜大赦五日矣

五松平見日說

元好問

竹港晨露白石門秋氣寒湍流落澗壑細路深茅菅江平白石出  
竟日沿清灣四顧不見人山鳥時間關蒼崖入地底煙靄青漫漫  
力盡不能過御坐空長嘆青天白雲閑可望不可攀虛名竟何得  
行路乃爾難

贈答楊煥然

元好問

詩亡又已久雅道不復陳人人握和璧燕石誰當分關中楊夫子  
高誨世所聞十年玄尙白藜藿甘長貧有來河水篇四海付斯文  
斯文有定在桓生知子雲古來知已難萬里猶比鄰千人國中和  
要非心所親東楚西南秦望君勞我神相逢不得語別去徒殷勤

白雲不可贈相思秋復春

曉發石門渡湍水道中

水經湍音專

元好問

疎星澹秋明陰霞絢朝映積雨成坐愁晨光動幽興石門歸馭引  
湍浦漁刀竝曠蕩萬景新歸藏四山靜平湖風漪綠遠岸秋沙淨  
洋洋游儻逝汎汎輕鷗泳隱顯乖夙心感寓見真性倦遊時自悼  
違已將安竟憂端從中來茫茫發孤詠

學東坡移居八首

元好問

廢地三畝餘十年長蒿萊瓦礫雜糞壤白骨深蒼苔孤客無所投  
卽此營茅齋墾斷豈不苦寢處亦可懷辱身賤者事寧當惜筋骸  
伐木荒林中運甕古城隈辛勤八十日吾事乃得諧買宅必萬錢  
一錢不天來今晨見此屋一笑心顏開

誰謂我屋寬寢處無復餘誰謂我屋小十口得安居南榮坐諸郎  
課誦所依於西除著僮僕休休得自如老我於其間兀兀窮朝晡  
起立足欠伸偃臥可展舒聰明火焙煖似欲忘囚拘屋前有隙地

客舍不可無花欄及菜圃次第當耘鋤東野載家具家具少於車  
我貧不全貧尙有百本書

故書堆滿床故物貯滿箱渾渾商寶高纍纍漢銅章杖飾昭敬恭  
嚴卯訶瘴剛雷文繞杖節獸面出佩瑛私印刻王尊玉斗蛟龍翔  
逸少留半紙魚網非硬黃亦有曇首帖不辦作鴈行雪景睿思物  
宣政舊所藏晉公古漁父浩歌濯滄浪因觀宮騎圖臥馳識提囊  
谿石含餘潤奚墨凝幽香南榮桂風響雲裾珮鏘鏘鏡背先秦書  
八字環中央讀之三嘆息此日何時光

壬辰困重圍金粟論升勺明年出青城瞑目就束縛毫釐脫鬼手  
攘臂留空橐聊城千里外狼狽何所託諸公頗相念餘粒分鳧鶴  
得損不相償坏土填巨壑一冬不製衣繒纊如紙薄一日僅兩食  
強半雜藜藿不羞蓬纍行粗識瓢飲樂敵貧如敵寇自信頗相憇  
兒啼飯籬空堅陣爲屢卻滄溟浮一葉渺不見止泊五窮果何神  
爲戲乃兩虐

金支雅卷二

三

舊隱嵩山陽笋蕨豐餽餉新齋浙江曲山水窮放浪乾坤兩茅舍  
氣壓華屋上一從陵谷變歸顧無復望樵漁憶還往風土夢閑曠  
恍如悟前身姓改心不忘去年住佛屋盡室寄尋丈今年僦民居  
臥榻礙盆盎靜言尋禍本正坐一出妄青山不能隱俛首入羈鞅  
巢傾卵隨覆身在顏亦強空悲龍髯絕永負魚腹葬置錐良有餘  
終身志戀創

國史經喪亂天幸有所歸但恨後十年時事無人知廢興屬之天  
事豈盡乖違傳聞入讎敵祇以興罵譏老臣與存亡高賢死兵飢  
身死名亦滅義士爲傷悲哀哀淮南城萬夫甘伏尸田橫巨擘耳  
猶爲談者資我作南冠錄一語不敢私稗官雜家流國風賤婦詩  
成書有作者起本良在茲朝我何所營暮我何所思胸中有茹噎  
欲得快吐之濕薪煙滿眼破鏡冰生髭造物留此筆吾貧復何辭  
東坡謫黃州符藥行江湖荒田拾瓦礫賤役分僮奴我讀移居篇  
感極爲悲歎九原如可作從公把犁鋤我貧公亦貧賦分無賢愚

論人雖甚媿詩亦豈不如此

此州多寓士論年悉肩隨風波同一舟奚必骨肉為倪家蓮華白  
每釀必見貽季昌妙琴事足以相娛嬉郭侯家多書篇帙得徧窺  
趙子篤於學閒以問所疑王生舊舍鄰窮達心不移千里訪存歿  
十口分寒飢獨有仲通甫天馬不可羈直以論詩文稍稍窺藩籬  
永懷王與李朔漢行當歸書來聞吉語報我脫繫維慚非一狐腋  
不直五段皮我作野史亭日與諸君期相從一笑樂來事無庸知

梨花海棠二首

元好問

梨花如靜女寂寞出春暮春工惜天真玉頰洗風露素月澹相映  
蕭然見風度恨無塵外人為續雪香句孤芳忌太潔莫遣凡卉妬  
妍花紅粉妝意態工媚嫵窈窕春風前霞衣欲輕舉金釵渺華屋  
國豔徒自許依依如有意脉脉不得語詩人太冷落愁絕殘春雨

宿張靖田家

地屬壽陽

元好問

川涂盡坡陀嶺路入荒梗微茫望煙火向背得廬井殘民安朴陋

金叢雅卷二

首

倦客喜幽屏兒童聞扣扉租吏有餘警兩崖紛聚薄砂石立頑嶺  
湍流落空嵌百折不為騁山深饒風露夜氣淒以耿園花澹相望  
邊月空照影深居苦不早素髮忽垂領誰謂林野人茲焉惜清景

同白兒賦瓶中玉簪

元好問

畏景眾芳歇仙葩此夷猶冰姿出新沐娟娟倚清秋昨夢今見之  
風鬟玉搔頭誰言閨房秀高情渺林邱碧筵古銅壺一室香四周  
懷人成獨詠遠思徒悠悠

別李周卿三首

元好問

行路漚於棘單車望千山歌君歸雲曲清涕留餘潛六年河朔州  
動輒得謗訕唯君篤高義日日來柴關古交松栢心今交桃李顏  
古人去不返古道挽不還相思一樽酒幽恨寄山閒

風雅久不作日覺元氣死詩中柱天手功自斷鰲始古詩十九首  
建安六七子中間陶與謝下逮韋柳止詩人玉為骨往往墮塵滓  
衣冠語俳優正如作婢使望君清廟瑟一洗箏笛耳

城居日蛙黽局促復局促去作山中客放浪誰檢束溪光淡於水  
山骨淨如玉懷我同心人團茅住深竹垂綸鮮可食種秫酒亦足  
石壇三萬丈醉眼天一粟安得萬里風相從兩黃鸝

九日讀書山中三首

元好問

行帳適南下居人踞庭戶城中望青山一水不易渡今朝川涂靜  
偶得展衰步蕩如脫囚拘廣莫開四顧半生無根著筋力疲世故  
大似丁令威歸來歎墟墓鄉閭喪亂久觸目異平素枌榆雖尚存  
歲晏多霜露

宇宙有此山閱世過鳥疾何人不此遊名姓寧復識茲辰世所重  
前代多盛集柴桑有故事二謝留俊筆併數孟與桓此外誰記憶  
人生百年內踏地皆陳跡獨惟我輩人興懷念今昔山林與臯壤  
自古長太息

我在正大初作吏浙江邊山城官事少日放浙江船菊潭秋花滿  
紫稻釀寒泉甘映入小苦幽光出清妍歸路踏月明醉袖風翩翩

金文雅卷二

五

父老遮我留謂我欲登仙一別半山亭回首十餘年江山不可越  
目斷西南天

元裕之以山游見招兼以詩四首爲寄因以山中之意仍其  
韻

麻九疇

石華政可採負我孤舟蓬胡爲紅塵裏擾擾槐安宮山閒綠蘿月  
一照千巖空洪崖去不返清游誰與同空餘松根泉雜佩流無窮  
人心墮泥滓不如與天通舉頭視霄漢浩浩露洗心胸  
日月兩角蝸天地一粒粟老盆可徑醉豈擇瓦與玉大笑區中人  
朱門丐梁肉清曉登少室日夕眺王屋紫煙晞吾髮碧霞貯我腹  
溪中有白雲萬事付濯足物物愜幽情不獨蘭與菊

南風入桂樹高葉碧崢嶸舉手戲攀折上與雲煙撐黃金閒白玉  
遍地先晶瑩笙簫坐閒發鸞鶴空中鳴浩歌山谷應起舞衣裳輕  
一尊石上酒如我浩氣盈目送飛鴻盡青雲萬里平  
國風久已熄如火不再然流爲玉臺詠鉛粉嬌華年政須洗妖冶

八駿踏芝田青苔明月露碧樹涼風天塵土一一盡象緯昭昭懸  
寂寥抱玉辨爭競搖尾憐幸有元公子不爲常語牽

西山避亂三首

王元粹

蒼山多回互四望令人迷過午日已暖殘雪融爲泥路滑不可進  
弱葛愁攀躋老幼委溝壑不如犬與雞嗷嗷同行子手中各有攜  
汲澗爲飲食架木爲巖栖夜半三四驚翁媪禁兒啼念我長病母  
亂離隔東西

野宿不得曉飛霜沾敝袍空山凝寒色天邊星月高憶昨離鄂城  
數家同遁逃穿林恐相失前後聞呼號避亂但欲遠焉知登頓勞  
俯臨萬仞壑性命輕鴻毛

青青道邊麥知是誰家田山田固已薄榛石復相連旁有破茅屋  
日入不見煙借問舊居者聞亂已西遷平生苦淪薄對此增慨然  
甲兵暗宇宙誰能安一廛愁憂無從訴仰面視蒼天伐木南澗底  
雙鹿過我前

金支雅卷二

去

置酒半山亭得秋字

麻革

懷抱久不寫兀坐如繫囚永懷西山勝浩蕩成茲遊巖壑互窈窕  
叢蘿鬱深幽飛煙入虛無長風跨崑邱楚甸散林莽商顏亦綢繆  
雷雨天地空景物入夜浮況當節律變萬物颯以秋雲來白日慘  
天澹清江流西望渺關河沈沈生暮愁蘭苕暗幽谷芰荷老芳洲  
一笑舉酒觴浩歌聊自酬幽賞興未極慨嘆心悠悠世事蒼茫外  
寒沙明白鷗

題梁氏靜樂堂

段成已

攘攘區中人役心名與利於身竟何有乾沒不少置叔敬有耳孫  
率犖與時異一官不肯覓閒居養高志築室塵境中有塵外意  
方其厭囂湫歸來行少壑牀頭一卷書淨洗紛華累苟能樂其樂  
寧復事吾事見客不吝情有酒卽成醉爲問東華塵何如北牕睡  
清風吹我懷萬事覺無味誰知方寸閒自有清涼地

陳子正容安堂

堂目作室

段成已

陳子少英邁逸氣不可挫典刑肖乃翁出語輒驚座行止非所能  
造物聽掀簸功名鷹在韞歲片蟻旋磨區區一邑中十載供史課  
結廬慕淵明志向有許大淡墨寫形似終日相對坐一室足我容  
百念付慵惰青山隱檐楹流水出其左植花數十叢種竹千百个  
事來若機張事去如甑墮浩然方寸閒不受塵一漉豈無二仲賢  
閒暇日相過有酒相獻酬有詩互賡和溪山人笑裏珠玉霏咳唾  
徜徉天地閒一物莫非我醉來語更真卿去我將臥主人正高枕  
山鳥莫啼破

傷別曲

王鬱

蘭皇飛暗塵征車紆去轍長安雖咫尺回首繁華歇故人亭下酒  
蛾眉眼中血平生慷慨腸忽作柔絲結傳聞紫塞傍秋烽下危堞  
班超未投筆來瑱空嚼鐵誰能金閨中坐眷娟娟月

送侯道士

張璪

十年走南北黃塵汙人衣翩翩夜啼鳥一枝無可依問君何所如  
鳧舄東南飛恨我不得往失脚穿與機從君知不能一笑人閒非  
何水無蒲魚何山無蕨薇終當拂衣去往叩雲山扉

金文雅卷三目錄

七言古詩

古劍行

晚夏驛騎再之涼陘觀獵山閒往來十有五日因書成詩

宇文虛中

春愁曲

醫巫閭

黃彌守畫吳江新霽圖

金山

題春雲出谷圖

徐茂宗蝸舍

修城行

河防行

樓前曲

蔡松年  
高士談  
蔡珪  
党懷英  
党懷英  
党懷英  
党懷英  
劉迎  
劉迎  
劉迎  
劉迎  
劉迎

金文雅卷三目錄

車輶輓

沙漫漫

敗車行

郭熙秋山平遠用東坡韻

西城觀水

都門觀別

暮春郭南

漢歌

中秋對月

游華山寄元裕之

山谷透絹帖

鄆城道中

怪松謠 雪後

姚子昂畫馬

劉迎  
劉迎  
劉迎  
劉迎  
劉迎  
趙風  
劉昂  
王礪  
蕭貢  
蕭貢  
趙秉文  
龐鑄  
馮延登  
李純甫  
李俊民

掃晴婦

沁源道中

修城去

送王生西游

京叔將拜婦于陳徵言為贈老嬾廢學茫無所得獨記其與

屏山雲卿襟期所在者非以為詩也

送德温同舍赴簾試

桃源行

贈王飛伯雜言

天門引

湘夫人詠

孤劍詠

南冠行

黃金行

李俊民

王特起

趙元

完顏璠

雷淵

元德明

元德明

李獻能

元好問

元好問

元好問

元好問

元好問

元好問

金文雅卷三目錄

二

并州少年行

范寬秦川圖

寄答溪南詩老辛愿敬之

聞欽叔在華下

游黃華山

高門關

送李參軍北上

汎舟大明湖

湧金亭示同游諸君

馮子遠扇頭

游龍山

幽蘭

古月一篇為裕之賦

賦伯玉透光鏡

元好問

李汾

麻九疇

竹癭冠爲李道士賦

夏日

跋伯玉命簡之臨米元章楚山圖

長門怨

長安行

秋風怨

麻九疇

麻九疇

麻九疇

杜仁傑

李獻甫

李獻甫

金文雅卷三目錄

七言古詩

古劍行

宇文虛中

公家祖皇提三尺素靈中斷開王迹自從武庫衝屋飛化作文星  
照東壁夫君安得此龍泉秋水湛湛浮青天夔魘奔喘禹強護中  
夜躍出光蜿蜒挂頤欄具男兒飾彈鋏長歌氣填臆嶙峋折檻霽  
天威將軍拜伏奸臣泣龍泉爾莫矜雄銳不見烏盡良弓藏會當  
鑄汝為農器一劍不如書數行

晚夏驛騎再之涼陘觀獵山間往來十有五日常因書成詩

蔡松年

兜羅惹鬱浮空青曉日馬頭雙眼明名山不作世俗態千里傾蓋  
來相迎老松閱世幾千尺玉骨冷風戰天碧應笑年年空往來塵  
土勞生種陳迹山回晚宿一川花翦金裁碧明煙沙寒香絕豔自

金文雅卷三

一

開落欲慰寂寞無流霞明日行營獵山麓古樹寒泉更深綠強臨  
冰玉照鬢毛只恐山靈怪我俗陂湖不盡水如天清波白鷗自在  
眠平時朝市手遮日思把一竿呼釣船驛騎回時山更好過雨秋  
容淨如掃山英知我宦遊心為出清光慰枯槁可憐歲月易侵尋  
慙愧山川知我心一行作吏豈得已歸意久在西山岑他年俗累  
羸能畢雲水一區供老佚舉杯西北酌山川為道此言吾不食

春愁曲

高士談

壓花曉露萬珠冷金井呬啞轉纖縷寶階寂寂苔紋深東風搖碎  
湘簾影芙蓉帳暖春眠重窗外啼鶯喚新夢推枕起來嬌翠翠一  
線沈煙困金鳳游絲飛絮俱悠颺慵倚繡牀春晝長郎馬不嘶芳  
草暗半篩急雨飛橫塘

警巫閭

蔡珪

幽州北鎮高且雄倚天萬仞蟠天東祖龍力驅不肯去至今鞭血  
餘殷紅崩崖暗谷森雲樹肅寺門橫入山路誰道營邱筆有神只

得峰巒兩三處我方萬里來天涯坡陀繚繞昏風沙直教眼界增  
明秀好在嵐光日夕佳封龍山邊生處樂此山之間亦不惡他年  
南北兩生涯不妨世有揚州鶴

黃彌守畫吳江新霽圖

党懷英

江雲捲宿雨江風散晨煙山光煙雨潤欲滴影墮江水空明間修  
蛾新妝翠連娟下拂塵鏡窺明蠲漁舟來何許觸破青茫然中流  
水肥魚逆上受網應有松鱸鮮借問張季鷹西風幾時還漁郎理  
網喚不應但見水碧江涵天如何塵埃中眼界有許寬道人胸次  
陂萬頃爲寫此境清而妍蒼崖無塵樹影寒直欲坐我苔磯邊我  
家竹溪陰小艇橫清漣異時赤腳踏兩舫不應尙作披圖看

金山

党懷英

我從渡淮涉高郵雪風連日吹行舟維揚地西闔月色星月隱見  
邊城樓晴光破曉射瓜步照耀玉宇開瓊洲馮夷收威浪妥帖容  
我一到金山頭金山勝概冠吳楚萬礎蟠峙江中流平生夢寐不  
到處乃以王事從私遊鍾山雨花落眼底海門鶴崖波際浮川開  
林闔望不極但見遠色明輕鷗風煙渺漭異吾土行役有程難久  
留一杯未舉帆影轉已看浙樹梢旗旒

金文雅卷三

二

題春雲出谷圖

党懷英

春雲乍出山有無春雲已去春山孤山光空濛不可寫正要雲氣  
相縈紆山吞雲吐變明晦半與崑谷生朝晡輕林蕭蕭暗溪樹餘  
影漠漠開樵居舟人艤棹並沙尾坐看縹緲搖空虛巧分天趣出  
畫外韻遠不與丹青俱今人重古不知畫但愛屋漏煙煤汗惜哉  
東坡不及見此本詩中獨有壘嶂煙江圖

徐茂宗蝸舍

党懷英

萬生擾擾安其安鸞鳩不羨鵬飛搏端知扶搖上九萬無異跳躍  
蓬蒿間是身江海一漂粟身外紛然皆外物一塵儻可容所寓何  
用渠渠作高屋知君從道由心成昔焉忘俗今忘形物來弭角不  
知競觸蠻血戰良虛名我夢敲門訪君舍舍小不容相對話覺來

驚見壁間蝸俯仰人間眞物化

修城行

劉迎

淮安城郭眞虛設父老年前向予說築時但用雞糞土風雨卽摧  
乾更裂祇今高低如堵牆舉頭四野青茫茫不知地勢實衝要東  
連鄂渚西襄陽誰能一勞謀永逸四壁依前護磚石免令三歲二  
歲間費盡千人萬人力唐州後竟用此策也

河防行

劉迎

南州一雨六十日所至川源皆汎溢黃河適及秋水時夜來決破  
陳河堤河神憑陵雨師借晚未及晴昏復下傳聞一百五十村蕩  
盡田園及廬舍我聞禹時播河爲九河一河旣滿還之他川平地  
迴勢隨弱安流是以無驚波祇今茫茫餘故迹未易區區議疏闢  
三山橋壞勢益南所過泥沙若山積大梁今世爲陪京財賦百萬  
資甲兵高談泥古不須爾且要築堤三百里鄭爲頭汴爲尾準備  
他時漲河水

金支雅卷三

三

樓前曲

劉迎

樓前山色秋橫碧樓下水光秋漫白眼看對此千里愁樓下長歌  
古離別蕭蕭郎馬何時歸鴈奴去作斜行飛灞橋過客夕陽遠渭  
城行人朝雨微玉淒花冷令人瘦日暮倚樓雙翠袖蕙炷猶殘鷓  
鴒香麴塵半著鴛鴦繡五雲飛過芙蓉城洞天冷落雲間笙妾身  
有願化春草伴君長亭仍短亭

車轆轤

劉迎

馬虺隤牛轂鯨山行縈紆車轆轤路旁指點是官人老矣一翁雙  
鬢禿汝牛幸可耕汝馬幸可騎有此可載琴書歸胡爲奔走東西  
道白髮刁騷被人笑

沙漫漫

劉迎

沙漫漫草班班南山北山相對看我行乃在山之間行人仰不見  
飛鳥樹木足知邊塞少沙漫漫草班班我行欲趁西風還僕夫汝  
莫愁衣單我但著衣思汝寒

敗車行

劉迎

前車行後車逐車聲夜隨山詰曲前車失手落高崖車輪直下聲  
如雷同行急救救不得人牛翻壓鳴聲哀我時潛聞後車說前車  
使牛何太拙只知拍手笑前人不道後來當改轍前途猶有坡陀  
在後車當以前車戒

郭熙秋山平遠用東坡韻

劉迎

槐花忙過舉子閒舊遊憶在夷門山玉堂會見郭熙畫拂拭縑素  
塵埃間楚天極目江天遠楓林渡頭秋思晚煙中一葉認扁舟雨  
外數峰橫翠巘淮安客宦踰三霜雲夢澤連襄漢陽平生獨不見  
寫本慣飲山綠澹湖光老來思歸眞日日夢想林泉對華髮丹青  
安得此一流畫我橫筇水中石

西城觀水

趙風

西山秋水來天地巨野橫流浩無際長風蹙浪鱗甲生兩角斜分  
半山際繚堤北去接飛橋鼓鞞洶洶翻驚濤中流突兀玉山起直

金文雅卷三

四

疑河伯驅靈鼈冷光搖蕩秋雲白渾似夢中游震澤隔林我欲喚  
漁郎孤帆忽如過烏翼安得酒船常拍浮四時甘味置兩頭何人  
與我同此樂穎陽試覓元丹邱

都門觀別

劉昂

買酒消閒愁翦刀翦流水閒愁不可消流水無窮已悠悠窗下斷  
腸波總是行人墮淚多門外馬嘶思遠道小頓猶唱渭城歌歌聲  
未斷征鞍發望斷垂楊人影滅斜陽照影卻歸來兩地相望今夜  
月闌人多矣主人翁離別都歸一笑中陌上行人終不悟年年楊  
柳怨東風

莫春郭南

王礪

大梁城外孤臺傍煙昏水碧春林芳憑高極目見歸鴈風物令人  
思故鄉紫金山下斜陽莫萬里川光照雲樹山間細雨花落時何  
人來往東風路

漢歌

蕭貢

華陰雙壁傳山鬼，報道明年祖龍死。草間豪傑伺天時，攘袖撫衿爭欲起。爨祠篝火妖狐語，夥涉爲王張大楚。南公舊有三戶謠，東井新看五星聚。中原茫茫走秦鹿，天遣沛公興白屋。大蛇斬斷素靈號，蚩尤祭罷朱旗蠹。榻來扶義入關中，恩結人心帝道隆。秦法煩苛猶一洗，項王慄悍何勞攻。三傑相須立人紀，四老仍來安太子。已令陸賈說詩書，更詔孫通制儀禮。阿翁著手規摹遠，獨恨兒孫讀城旦。王純霸雜寧不知，不是不知知已晚。

中秋對月

蕭貢

去年中秋客神京，露坐舉杯邀月明。今年還對去年月，北風黃草遼西城。年年月色長清好，只有悲秋人已老。兒童不解憶長安歌，舞團圍遶翁媪。人生宦游真可憐，不知何處度明年。預愁老罷廢詩酒，負此冰玉秋嬋娟。我生萬事隨緣耳，居自無憂行亦喜。君不見杜子閨中只獨看，鄜州寂寞千山裏。

游華山寄元裕之

趙秉文

金安雅卷三

五

我從秦川來，遍歷終南游。莫行華陰道，清快明雙眸。東風一夜橫，作惡塵埃咫尺迷。崑幽山神戲人亦薄相，一杯未盡陰霾收。但見兩崖巨壁插，劒戟流泉夾道鳴。琳瑯希夷石室綠，蘿合金仙鶴駕空。悠悠石門畫，斷一峰出婆娑。石上爲遲留，上方可望不可到。崖傾路絕令人愁，十盤九折羊角上。青柯坪上得少休，三峰壁立五千仞。其下無址傍，無倚巨靈仙。掌在霄漢銀河飛，下青雲頭或云奇。勝在高頂，腳力未易供。冥搜蒼龍嶺，瘦苔辭滑嵌空石。磴誰雕鏤，每憐風自四山而下，不見底。惟聞松聲萬壑寒，颼颼捫參歷井到絕頂。下視塵世區，中囚酒酣蒼茫瞰。無際塊視五岳芥，九州南望漢中山。碧玉簪亂抽，况復秦宮與漢闕。飄然聚散風中漚，上有明星玉女之洞天。二十八宿塚且周，又有千歲之玉蓮。花開十丈藕，如舟五鬣不朽之長松。流膏入地盤蛟蚪，采根食實可羽化。方瞳綠髮三千秋，時聞笙簫明月夜。芝翬羽蓋來瀛洲，乾坤不老青山色。日月萬古無停轉，君且爲我挽回六龍轡。我亦爲君倒卻萬

河流終朝汗漫游八極乘風更覓元丹邱

山谷透絹帖

龐鑄

君不見李廣射虎如射兔霹靂一聲石飲羽又不見巨靈華山如  
擎雲蓮華萬仞留掌痕精神入物物乃爾筆端有神亦如此熙豐  
以來推善書日下無雙黃太史胸中八法蟠虹霓眉目仙人容並  
馳平生敗筆塚纍纍妙處不減磨崖碑呂侯好古兼好異與字分  
身作游戲清潭錯落印星壁大澤縱橫散龍蛻又如漢宮粉黛爭  
嬋娟倚風顧影影更妍豈無硬黃官紙與臨做畫師寫照非天然  
呂侯之子今詩仙傳家以此為青氈須防神物有時合卻逐六丁  
飛上天

鄆城道中

馬延登

北風慘澹揚沙塵鄆西三日無行人十村九村雞犬靜高田下田  
狐兔馴昨朝屏息過溪口知有白額藏深榛赤子弄兵更可憫路  
旁僵尸衣血新野叟偃僕行拾薪欲語碎易如驚麋瘦梅疎竹未

慰眼只有清淚沾衣巾

李安雅卷三

六

怪松謠

李純甫

阿誰栽汝來幾時輪困擁腫蒼蚪姿鱗皴百怪雄牙髭拏空天矯  
蟠枯枝疑是秘魔巖中老慵物旱火燒天鞭不出睡中失卻照海  
珠羞入黃泉蛻其骨石錯沙鋼汗且僵埋頭臥角政摧藏試與摩  
拏定何似怒我根鬚鬚張壯士囚縛不得住神物世間無著處  
隄防夜半雷破山尾血淋漓飛卻去

雪後

李純甫

玉環暈月蟠長虹飛沙卷土號陰風黃雲冪冪翳晴空屋頭唧唧  
鳴寒蟲天符夜下扶桑宮元冥震怒鞭魚龍魚龍飛出滄海底咄  
嗟如律愁神工急劇北斗捲雲漢淩淩捲入天瓢中椎璋碎璧紛  
破碎六花翦出寒瓏璫翩翻作穗大如手千奇萬巧難形容恍如  
墮我銀沙界清光縞夜寒腫臃肝腸作祟耿無寐試把往事問追  
窮男兒生須銜枚卷甲臂瑯弓徑投虎穴策奇功不然羊羔酒漲

玻璃鍾侍兒醉臉潮春紅誰能蹇驢駝著灞陵東骨相寒酸愁煞  
儂屏山正吐黃齋氣笑倒坐間亡是公

姚子昂畫馬

李俊民

雄姿卓立開天骨騰踏萬里如神速可憐不遇九方臯空使時人  
指爲鹿自從大奴守天育無由更騁追風足中原一戰收乾坤白  
髮將軍髀生肉

掃晴婦

李俊民

世俗爲掃晴婦者蓋假變理之手導陰陽之和使民間免乾  
溢之患也感其事而賦之

卷袖褰裳手持帚挂向陰空便搖手前推後卻不辭勞欲動不動  
誰學肘偶人相對木與土神女但勞朝復暮龍公不作本分事中  
間多少閒雲雨見說周人憂旱母寧知東海無冤婦慙勤更倩封  
家姨一時斷送龍回首

沁源道中

王特起

金文雅卷三

七

野夫不識武城宰問之無言色微改但說今年秋雨多黃菁滿谷  
無人采踏遍西城錦石盤莫投佛屋解征鞍隔林依約見燈火山  
谷人家初夜寒

修城去

甲戌歲忻城陷官復完治  
途中聞哀歎聲感而有作

趙元

修城去勞復勞途中哀歎聲嗷嗷幾年備外敵築城恐不高城高  
慮未固城外重三濠一鋏復一杵灑盡民脂膏脂膏盡猶不辭本  
期有難牢護之一朝敵至任摧擊外無強援中不支傾城十萬戶  
屠滅無移時敵兵出境已踰月風吹未乾城下血百死之餘能幾  
人鞭背驅行補城缺修城去相對泣一身赴役家無食城根運土  
到城頭補城殘缺終何益君不見得一李勤賢長城莫道世間無  
李勤

送王生西遊

飛伯

完顏鑄

紫陘仙人今淵雲騎風御氣七尺身丈夫恥與噲等伍故作野鶴  
昂雞羣往年書劍游梁日咳唾中間滿珠璧温子徒勞手八叉蘇

老猶迷目五色慨然拂袖游嵩陽西南陌上書傳香仲宣堂堂舍  
我去舉杯卻愁愁更長去程相近黃花節三十六峰如玉列龍門  
楓葉墮紅綃洛浦蘆花舞晴雪勳名細事猶秋毫政可痛飲讀離  
騷天津月照紫綺裘緜嶺風吹青玉簫我無羽翼隨君起浩歌相  
送秋光裏憑高西望青茫茫落日無情下寒水

京叔將拜埽於陳徵言爲贈老嬾廢學茫無所得獨記其興  
屏山雲卿襟期所在者非以爲詩也

雷淵

梁苑池塘生綠煙吹臺草色春芊芊故人幽局閉長眠氣概英英  
猶眼前陽春無力蘇重泉孝子感時涕泗漣匄歸埽淮陽阡徵  
子贈別意拳拳我自頑頓須人鑄安能視後輒子鞭姬情孔意星  
日懸幹旋萬化中持權斯文興喪實關天尋常墨客技藝然醫巫  
星厯相比肩何用雕琢空祖年卽今海縣漫腥臙獨挽洙泗可洗  
湔迺公有志屏山賢二豪在日子牽連傷哉未售墳已顛老我欲  
種南山田子之兄弟其周旋事業絕勝空言傳

金安雅卷二

八

送德温同舍赴簾試

元德明

太常侍祠水蒼珮內相夜下金蓮燭皇家結網未曾疏亦有佳人在  
空谷一從唐賦變遼律仰視折楊猶雅曲雲臺勳業一青衫被  
髮操戈踵相屬筋疲力涸僅乃得墨水一升凡幾辱英雄俯首入  
彀中舉世悉然非子獨子家口眾親又老歲月甘須寸祿薦書  
聞說過南宮冷暖人間到僮僕我初與子偕計吏人後人前隨碌  
碌不慚齊客售鼓瑟頗爲荆人悲獻玉一詩今日送君行萬里秋  
風看鴻鵠功名前路知不免雞黍後期良未卜錦標無用咤龍頭  
帛書且當傳鴈足

桃源行

元德明

山中三月山桃開紅霞爛漫無邊涯山家藏春藏不得落花流水  
人間來憶昔攜家竄巖谷秦人半向長城哭回頭塵土失咸陽繒  
弋徒勞羨鴻鵠冬裘夏葛存太樸小國寡民皆樂俗畫永垣籬雞  
犬閒春晴門巷桑榆綠漁郎偶到本無心仙境何緣得重尋今日

武陵園上看唯見雲林深復深

贈王飛伯雜言

李獻能

東風吹客衣敗絮逐風飛  
曉雪沒寒齋無物充朝飢  
空簞嘖嘖號飢鼠  
蠶蠕蠕緣破袴人生豈是犬  
與雞終歲區區守門戶  
游說萬乘苦不早儀秦殆是穿窬盜  
六國印千金車滿眼榮華境中老  
孔子聘列國孟軻游齊梁能令千載後  
名與日月光男兒生世不虛生  
死恨身後無聲名不然鳴玉游紫京  
不然著書談六經九日可射天  
可補鞭笞百蠻作降虜離騷一篇亦不惡  
雄筆盤盤映千古君不見彩鳳翔丹霄  
一鳴應九韶寸雲起泰山霖雨滿人間  
丈夫窮達果在天安用兒女得志相歆羨  
失志相悲憐仰天大笑出門去四海今誰魯仲連

天門引

元好問

秦王深居不得近從破衡成欲誰信  
白頭游客困咸陽憔悴黃金百斤盡  
海中僊人黃鵠舉大笑人間爭腐鼠  
丈夫何意作蘇秦六

金叢雅卷三

九

印才堪警兒女古來多爲虛名老  
不見阿房淨如埽千年虎豹守天門  
一日牛羊臥秋草

湘夫人詠

元好問

木蘭芙蓉滿芳洲白雲飛來北渚游  
千秋萬歲帝鄉遠雲來雲去空悠悠  
秋風秋月沅江渡波上寒煙引輕素  
九疑山高猿夜啼竹枝無聲墮殘露

孤劔詠

元好問

鬱鬱重鬱鬱夜半長太息吟成孤劔詠  
門外山鬼泣清霜稜稜風入骨殘月耿耿  
燈映壁君不見一飢縛壯士僵臥時  
自惜黃鵠一舉摩蒼天誰念樊籠束修翼

南冠行

元好問

南冠纍纍渡河關畢逋頭白乃得還  
荒城雨多秋氣重頽垣破屋深茅菅  
漫漫長夜浩歌起清涕曉枕留餘潛  
曹侯少年出紉綺高門大屋垂楊裏  
諸房三十侍中郎獨守殘編北窗底  
王孫上客生

光輝竹花不實鴉雛飢絲桐切切解人語海雲喚得青鸞飛梁園  
三月花如霧臨錦芳華朝復暮阿京風調阿欽才暈碧裁紅須小  
杜長安張敞號眉嫵吳中周郎知曲誤香生春動一詩成瑞露靈  
芝滿窗戶魚龍吹浪三山沒萬里西風入華髮無人重典鶻鴉裘  
展轉空牀臥秋月寶鏡埋寒灰鬱鬱萬古不可開龍劍出地底青  
天白日驅雲雷層冰千里不可留離魂楚些招歸來生不願朝入  
省暮入臺願與竹林嵇阮同舉杯郎食猩猩唇妾食鯉魚尾不如  
孟光案頭一杯水黃河之水上流何物可煮人間愁撐霆裂月  
不稱意更與倒翻鸚鵡洲安得酒船三萬斛與君轟醉太湖秋

黃金行

贈王飛伯

元好問

王郎少年詩境新氣象慘澹含古春筆頭仙語復鬼語只有溫李  
無他人天公著詩貧子身子曾不知乃自神人間不買詩名用一  
片青衫衡霍重兒貧女富母兩心何論同袍不同夢入門喚婦不  
下機淚子垢面兒啼飢君詩只有貧女謠何曾夢見金縷衣外家  
翁媪日有語嫁女書生徒爾爲昆陽城下三更酒醉膽輪困插星  
斗一夕詩腸老蛟吼十尺長人墮車走斫頭不屈三萬言欲向何  
門復低首何人壽我黃金千使君破鏡飛上天

并州少年行

元好問

北風動地起天際浮雲多登高一長嘯六龍忽蹉跎我欲橫江鬪  
蛟鼉萬弩逆射陽侯波或當大獵燕趙間黃熊朱豹皆遮羅男兒  
萬馬隨攜訶朝發細柳暮朝那埽雲黑山布陽和歸來明堂見天  
子黃金橫帶冠峩峩人生只作張騫傅介子遠勝僵死空山阿君  
不見并州少年夜枕戈破屋耿耿天垂河欲眠不眠淚滂沱著鞭  
忽記劉越石拔劍起舞雞鳴歌東方未明兮奈夜何

范寬秦川圖

元好問

亂山如馬爭欲前細路起伏蛇蜿蜒秦川之圖范寬筆來從米家  
書畫船變化開闔天機全濃淡覆露清而妍雲興霞蔚幾千里著  
我如在峩峩巒西山盤盤天與連九點盡得齊州烟浮雲未清白

日晚矯首四顧心茫然全秦天地一大物雷雨瀕洞龍頭軒因山  
分勢合水力眼底廓廓無齊燕我知寬也不辨此渠寧有筆如修  
椽紫髯落落西溪君長劍倚天冠切雲望之見之不可親元龍未  
除湖海氣李白豈是蓬蒿人愛君恨不識君早乃今得子胸中秦  
作詩一笑君應聞

寄答南溪詩老辛愿敬之

元好問

五年不喚溪南渡日夕心馳洛西路山中今日見君詩惆悵良辰  
又相誤龍蛇大澤變風景虎豹天門鬱煙霧丈夫不合把鉏犁青  
鬢無情忽衰素平泉漫作窮愁志笠澤休題自憐賦長安正有五  
侯鯖骹誰能作樓護青燈老屋深蓬蒿蝙蝠掠面莎雞號劍歌  
夜半激悲壯松風萬壑翻雲濤區區墓上曹征西我知慚愧王東  
皋人生只有一杯酒螟蛉螺贏安能豪

聞欽叔在華下

元好問

翰林仙人詩酒豪平生嵇阮參游遨山中草棘滿霜雪可惜渠家

金文雅卷三

七

宮錦袍聞君忍飢讀離騷思之不見心爲勞舉頭西望忽大笑太  
華落長庚高

游黃華山

元好問

黃華水簾天下絕我初聞之雪溪翁丹霞翠壁高歡宮銀河下濯  
青芙蓉昨朝一游亦偶爾更覺摹寫難爲功是時節氣已三月山  
水赤立無春容湍聲洶洶轉絕壑雪氣凜凜隨陰風懸流千丈忽  
當眼芥蒂一洗平生胸雷公怒擊散飛雹日腳倒射垂長虹驪珠  
百斛供一瀉海藏翻倒愁龍公輕明圓轉不相礙變見融結誰爲  
雄歸來心魄爲動蕩曉夢月落春山空中仙人九節杖每恨勝  
景不得窮攜壺重來巖下宿道人已約山櫻紅

高門關

元好問

高門關頭霜樹老細路千山萬山繞亂餘村落不見人霰雪霏霏  
暗清曉莘川百里如掌平閑田滿眼人得耕山中樹藝亦不惡誰  
道多田知姓名許李申楊竟何得只今唯有石灘聲

送李參軍北上

元好問

五日過居庸十日渡桑乾受降城北幾千里出塞入塞沙漫漫古  
來丈夫淚不灑別離間今朝送君行清涕留餘潛生女莫作王明  
君一去紫臺空佩環生男莫作班定遠萬里馳書望玉關我知驥  
子墮地無齊燕我知鴻鵠意氣青雲端草間八鷓亦自樂扶搖直  
上何勞搏一衣徹溫袍一飯苜蓿盤歲時壽翁媪團圞有餘歡就  
令一朝便得八州督爭似綵衣起舞舞春爛斑去年洛陽人今年指  
天山地遠馬羈破霜重貂裘寒朔風浩浩來客子慘在顏扼胡嶺  
上一迴首未必君心如石頑君不見桓山烏乳哺不得須與閑眾  
雖一朝散孤雌回顧聲悲酸寒鴈來時八九月白頭阿母望君還

汎舟大明湖

待杜子不至

元好問

長白山前繡江水展放荷花三十里青山水底山更佳一堆蒼煙  
收不起山從陽邱西來青一灣天公擲下半玉環大明湖上一杯  
酒昨日繡江眉睫間晚涼一棹東城渡水暗荷深若無路江妃不

金支雅卷三

七

惜水芝香狼藉秋風與秋露蘭襟鬱鬱散芳澤羅襪盈盈見微步  
晚晴一賦畫不成枉著風標誇白鷺我時驂鸞追散仙但見金支  
翠鞋相後先眼花耳熱不稱意高唱吳歌叩兩絃喚取樊川搖醉  
筆風流聊與付他年

湧金亭示同游諸君

元好問

太行元氣老不死上與左戒分山河有如巨鼇昂頭西入海突兀  
已過餘坡陀我從汾晉來山之面目腹背皆經過濟源盤谷非不  
佳煙景獨覺蘇門多湧金亭下百泉水海眼萬古留山阿鱗沸藥  
水源淵淪晉水波雲雷涵鬼神窟宅深蛟鼉水妃簸弄明月璣地  
藏發泄天不訶平湖油油碧於酒雲錦十里翻風荷我來適與風  
雨會世界三日漫兜羅山行不得山北望空長哦今朝一掃眾峰  
出千鬟萬髻高峩峩空青斷石壁微茫散煙蘿山陽十月未搖落  
翠鞋雲旛相盪摩雲煙故爲出濃淡魚鳥似欲留婆娑石間仙人  
迹石爛迹不磨仙人去不返六龍忽蹉跎江山如此不一醉拊掌

笑煞孫公和長安城頭烏尾訛并州少年夜枕戈舉杯爲問謝安  
石蒼生今亦如卿何元子樂矣君其歌

馮子達扇頭

元好問

溪光冷於冰山骨淨如玉白雲自老人自閒莫遣秋風破茅屋

游龍山

元好問

曩子魏大梁得交此州雷與劉自聞兩公誇南山每恨南海北海  
風馬牛老龍面目今日始一見更信造物工雕鏤是時山雨晴平  
田綠油油並山涼氣多況得通深幽山泉谷口出迎客石罅戛擊  
琳琅球蜿蜒入微行漸覺藤蘿宵衣樹打頭惡木拉颯棲直幹比  
指稱石門無風白日靜自是林響寒颼颼一峰忽當眼仰看看不  
休一峰一峰百千峰雖欲一一顧揖知無由金城偃蹇不得上瑤  
甕回合如相留苔花萬錦石丹碧爛不收天關守虎豹武庫開戈  
矛小山隨起隨偃仆獨立千仞絕頂縹緲之飛樓百花岡頭藉草  
坐瀟灑正值金蓮秋亭亭妙高臺玉斧何時修登高攬玄化快如

金安雅卷三

三

鷹脫鞞山靈故爲作開合巧與詩境供冥搜白雲何許來纖絲弄  
輕柔蓬蓬作霧湧飄飄與煙浮玉衣仙人鞭素虬翕忽變化令人  
愁須臾視六合浩蕩不可求初疑陶輪比運甕今悟夜壑眞藏舟  
劫石拂未窮杞國浪自憂斷鼇立極萬萬古爭遣起滅如浮漚快  
哉萬里風一掃天四周誰言太始再開闢日馭本自無停輓舉手  
謝山靈就無清涼臺相非神羞賤子貪山名客刺已屢投黃華挂  
鏡臺天壇避秦溝太山神明觀二室汗漫游胸中隱然復有此大  
物便可揮斥八極隘九州玉峰有佳招絕唱須一酬爲君探囊擲  
下珊瑚鉤白雲相望空悠悠異時華表見老鶴姓字莫忘元丹邱

幽蘭

元好問

仙人來從舜九疑辛夷爲車桂作旂疏麻導前杜若隨披猖芙蓉  
散江蘿南山之陽草木腓澗岡重復人迹希蒼崖出泉懸素霓翳  
然獨立風吹衣問何爲來有所期歲云暮兮胡不歸鈞天帝居清  
且夷瑤林玉樹生光輝自棄中野誰當知霰雪慘慘清入肌寸根

如山不可移雙麋不返夷叔飢飲芳食菲尙庶幾西山高高空蕨  
薇露繁無人薦湘纍山鬼切切雲間悲空山月出夜景微時有彩  
鳳來雙棲

古月一篇爲裕之賦

李汾

古月天不收敵君三萬秋天孫弄明鏡光湧雲間流憶昔放逐江  
南州金陵女兒歌權謳草裏烏紗巾散著紫綺裘酒酣把玉笛直  
欲捫參厯井騎斗牛醉中呼兒搖雙舟吾欲乘流下石頭起來茫  
茫視八極萬里只有元丹邱丹邱子游人間風塵何爲往復還玉  
華山人近招我九日朝帝蒼梧山

賦伯玉透光鏡

麻九疇

太陰淪魄元不耀太陽分光成二曜嗚呼怪銅盜此幻透影在壁  
與背肖奩開燿燿光走庭劃如剗犀牛脫鞞泓澄秋落百丈潭疑  
有龍向天門跳秦娃漢婉化鴛土寵雨恩雲埋鳳詔當年椒塗鑑  
桃李身後泉臺映蓬翟枕簟無情草木香笙歌不暖梟狐嘯羈體

金支雅卷三

酉

一醜不再妍不知持此將安照萬斛珠璣委侖人喚得偷見成鬼  
剽借問金椎一控時何如海上青蠅弔壽如金石佳且好此銘此  
篆兩奇峭今誰子後曩誰先贏得紐樞經蟻竅萬古繁華一夢醒  
恍然入手稱神妙丹砂口紫翠羽青萬金難買人年少君侯新自  
洛陽來玉臺人物今温嶠相看大笑古人癡收鏡入奩還自笑

竹癭冠爲李道士賦

麻九疇

東方有物字豐隆以鳴爲職驅羣萬頭濺濺囚凍窟欲出不出  
愁天公迴寒作暖出一噫黑帝不敢藏昆蟲所以獨爲六子長揮  
斥元氣周神功車轟鼓震頃萬里六甲風雲隨喚起四陰用事合  
收聲猶奮狂陽鳴不已號令非時遭物玩草木不彫花再蕾惱得  
司秋訴帝闈漏泄機緘法當死天公大怪下桎梏推落車中墮巖  
谷非程非馬亦非人化作蒼篔一枝竹勁氣剛風難遽銷夜聞風  
雨猶蕭蕭聳身直上三千尺天公又怪干雲霄鬼壓神縛不聽出  
只見白雲鎖三日雲散惟餘青屈盤頤隱於臍變仙質道人真是

萬物盜斫取爲冠就天巧秋霜爭取上頭顱常與春風同醉倒此冠固奇惜未大有冠獨在方之外日月爲藤織四時烟霞爲樺綿千載天潢絕漢梁虛碧北斗旋衡簪沉澗不隨脂粉侶狡狴不逐風霜陪獬豸一任旋乾復轉坤頭上栽栽終古在欲作檀那施此冠不識先生若爲戴

夏日

麻九疇

亭柯碧合龍蛇影睡起輓轡鳴曉井一簾曉雨捲不晴槐花滿地黃金冷屈指西風又到門相思團扇欲生塵何時萬戶垂楊裏高揖金鞭逢故人

跋伯玉命簡之臨米元章楚山圖

麻九疇

巴東峽壁如駁霞天鑿荆門當虎牙下有奔湍沈碧沙直衝北固如投家雲煙昏曉互明滅朝看沃日莫吞月遠山如指近如拳過客那知空一瞥高人廬此恨來晚不厭孤篷疊往返莫言造物好窮人許大乾坤富君眼以心爲鏡照諸山山如人面紛殊顏扁舟

金文雅卷三

五

日日青山上青山卻在滄波間人道癡兒固貪取我怪高人亦如許已將胸次衽長江更把毫端扛巨楚齊列楓林葉浮舸巧促魁梧入么麼丈尋收拾無邊春千里游遨坐中我自此頭吳尾甌越蠻煙五月髡人髮江山多處乃爾毒始信中原天下甲楚山可覽不可上水氣昏昏且多恙畫山縱不到眞山有楚之峰無楚瘴靜明居士見山饑想在庵中得飽參戲呼老李臨君畫已坐君貪我更貪

長門怨

杜仁傑

天上神仙也別離人間那得鎮相隨不須貴買臨邛賦只想君王未見時

長安行

李獻甫

長安道無人行黃塵不起生榛荆高山有峰不復險大河有浪亦已平向來百二秦之形祇今百二秦之名我聞人固物乃固人不爲力物乃傾將軍誓守不誓戰戰士避死不避生殺人飽厭敵自

去長安有道誰當行黃塵漫漫愁煞人但見蔽野雞羣鳴河東獅  
子淚如雨眼花落日迷秦城長安道無人行長安城中若爲情

秋風怨

李獻甫

疏星耿耿明天河夜涼翠幕生微波碧梧委葉傳天井一夕秋風  
將奈何春風令人和秋風感人悲妾愁自與秋風期秋風爭管人  
別離燈炷垂紅粉泥暗氈甲屏風雲影亂絡緯弔月啼不斷蓮漏  
壓荷夜未半涼飈蕭蕭入疏竹枕底寒聲碎瓊玉敲愁撼睡睡不  
明花露盈盈泣魚目秋風且莫吹念妾守空閨嫁狗隨走雞隨飛  
九死莫作蕩子妻郎薄倖妾薄命花自無言絮無定碧雲暮合郎  
未歸幾度妝成掩明鏡

